

## **Editorial**

Khah he, vaw pahripaziah heih tua ei si, thâchhie eimâ reina châ vei. Eima râh liata thâtihbu nata Magazine-zy Mara reih ta vaw papua tyh pi ta, rei sie thei tyh vei. Zâhkô lâ kha Siaha Vaihpi MTP ta ‘Thilihua’ nai zualuapa vaw pathlisa ei ta, buakha vaw pathli ta, a diah haw. MTP New Colony ta ‘Huasua’ biethâh miah vaw hlâ heih ei ta, he biethâh he a pyury chhao a vaw ru kaw hra. Châhrasala, Huasua biethâh hnazô cha hmô khao heih ma pi. Nohto thâtihbu ‘Zawpi’ chhao lytlâh miah a khôsaina a rei haw.

Meisavaih ‘W’ MTP thâtihbu ‘Aolainô’ pyu chhao kha buakha la a pyu a vaw ru kaw, rei sie thei pyly veih ei. MSO General Headquarters Bulletin ‘Vyhphao’ vaw pua heih ta, “Aw, he tlai hih..”, tah pi ta, zakhei chhao â chhih lei kaw. Thla kha thla no vaw pua ta, hmô khao heih ma pi. MTP Headquarters Magazine ‘Bydi’ chhao kha buakha cha lyuhbie miah a vaw hlâ hmâ hra khawh. A thlôh thlâ bao nahta miah vaw hlâ chanei thei khao heih vei.

Py nano nanopa nata mo pakhazy ta Mara reih ta thâtihbu nata Magazine-zy vaw papua tyh ei ta, thlai ama chhâ ha tyh. Awhsicharu he panao châh hnei hrasala pua pazao hnolo lymâ ta; Deiva, Mararâh Thlalâ nata Times of Maraland zy vaw pua laih ta, Marasawzy eima tha a pawh ngaita kaw; rie tiama papua via lymâ awpa ta eimâ haw. Art & Culture, MADC nata Board of Mara Literature zy ta Magzine papua hnolo hra ei ta, College Vaih MTP ta kô 2010 tawhta chiepadâh leipa ta ‘Siaramo’ papua lymâ hra ei ta, hezy heta Mara Literature husona ama pazao hnolo tyh. Awnanopa lâta thâtihbu nata Magazine deikua a pua hluh kaw, a ly’pa a châ hmeiseih.

Hmo chynawhpazya ta eima pachâpazya heta chi nata pho cheihchalo ta, pabohsa tyh ta, hmahsiena a tlôkhei tyh. He Mara reih ta thâtihbu nata Magazine apuapazya he pasô thai ei suh u. Eima vaw rei hapazya ama pua pazao khao leina chhâpa cha zawpi ta pasô thai leipa pi ta, a mâ eima pie pha tyh lei vâ a châ. Buakheituhpazya ta buakhei aw ei ta, areihtuhpazya ta a mâ eima pie pha hr’awpa â ngiah. Hla nata bie chhao atahmâ tawhta cha Copy 580 lâta vaw papôh pi ta, latuhpazya ta a mâ nama pie pha vei khiata la papua pazao thei hr’aw ma pi.

## **Target hneipa ta pachutuhpazya ta hâti nahzy pachu ei sih la...**

*~ K. Vanlalliana*



Eima râh liana heta CCE hawhta pachuna Elementary Stage liata siekheipa a châ tawhta achuhaipazya liata thaina a tlapahnai viapa hawhta reina a y tyhpâ he a chhâpa hluhpi y thei aw ta, a viapahchaipa ta pachutuhpazya diathlâna vâta a châ eima tah thei aw. A chhâpa cha CCE dâh liata “Achuhaipazya cha py amâ pasie cheingei awpa a châ” tahpa reina hmâpa ta athai leipazya chhao pachutuhpazya pi ta *grading* do leipa pie pi ta py eima pasiesa tyh.

CCE dâh pyly liata, “Achuhaipazya cha ama thai cheingei awpa a châ, Class liata ama thai khai leipa chhaota Saku o lia tlyma, o lâ tlyma Remedial Teaching pie awpa châ ta, achuhaipa cha ama pathaisa cheingei awpa a châ”. tah ta. Cha hawhpâ a châ khahta cha, châ ama thai hnôhkua, py â pasie lei thei veih ei. Cha cha CCE ta â chhuahpa a châ.

“Châ pathaisa cheingei awpa a châ” tahpa nata, “Py amâ pasie awpa a châ”, tahpa liana heta a rainao viapa, thathi zôhmy pâpa ta pachuna raihria theina nata âdo lei kawpa ta achuhaipazy dôvei theina lâpi a tlyh pi ta. “Py amâ pasie awpa a châ”, tahpa cha, “Châ pathaisa cheingei awpa a châ”, tahpa hlâta a tlyh viapa eima lyu. He vâna heta Saku hawti (Chyhsa) parao pi ta, chhôhkha parao pi ta, khiatlâh parao pi ta, râh eima parao tahpa rai pachâ ma pi.

Pachutuhpazy pi heta, “Achuhaiapazy châ eima pathaisa cheingei awpa a châ”, tahpa he atlyh ei sih la, thapi phia ei sih la, phahnai angiah ei sih la, eima pathaisa thei lei n’awpa y vei. CCE hawhta Remedial Teaching chhao pie tyh ei sih la, chata chhochhi khahta cha ama thai khai aw tahna a châ. Cha hawhta châ pathaisa awpa cha pachutuhpa eima châna chhâpa chhao châ ta, sawhkhâ rai hria pi ta, thla hlao eima lana chhâpa chhao a châ hra.

Chavâta pachutuhpa palôhrupa liana heta athai-leipazy py pasiesa/pakiasâh lâchhâh sai he y leipa sala, pathaisa awpa lâchhâh he eima palôhrupa lia y via sala, ama thai khahta la py cha apasie awpa ama châ (automatic ta). Pa pass-sa/pakiasâsa awpa pyly châ ei ta, tahpa palôhru eima phaoh khahta cha haiphiahpa ta *grading* tao awpa byuh ta, saku hawti dôvei pi ta, sawhkhâ dôvei pi ta, Khazohpa chhao eima dôvei hra tahna a châ. Eimâ ngiapâna hro taihta maniah pabua thei ta, chavâta â do kawpa ta eima rai he hria ei suh u.

A chhâ chaina ta cha Target hneipa ta pachuna rai hria ei sih la, thapawh â chhih (a challenging) kaw aw vei mâ tahpa pachâna ei hnei. Pachutuhpa pakha ta hawti athai lei viapa 2 or 3 pathaisa cheingei achhuah ei sih la, cha hawh tlaita athai thei lei viapazy eima pathaisa thei khahta cha eima raihria theilâpa liata aly chaipa eima châ nahta ei pangiasi. Eima raihria theilâpa liata alyna tluta alyna sôhpa he a y thai vâ ma? Cha hawh hrana chata pachutuhpa hropazy chhaota Target chyu hneipa ta pachuna rai ama hria khahta cha eima Saku dei châ leipa ta, eima râh ta thaina sona liata râh hropâ vâ angiah aw ma pi. Palôhru, tha nata sôh hluhpi hryuh leipa ta eima râh nata khîh chyu liana heta châ thai (Quality) kawpa ta eima hâti nahzy he eima papua thei tahpa pahno ei suh u.

## MOTHER – TONGUE

~ VL. Thakima Chozah



**“Mother-tongue”** tahpa he achhopasiana nata reipasiana hluhpi y thei ta. Mara chizy châta cha Mara Reih he eima *Mother-tongue* a châ eima tah thei aw. Reipasia chhao angiah leipa, chyhsa to pahnopa a châ eima tah thei hra ngyu aw; châhrasala *Mother-tongue* chôchâh liana heta pachâna dâh alyu leipa nata paliena zie chi nano nanopa hluhpi y ta. Chazy hry liata apyhtlâh a châ viapa thokhazy achyu theina hawhta alaichadai eimâ chhuah tua aw.

**Pihkheipa Reih:** Mother-Tongue tahpa he Mara Reih lâta eima paliena nata hmâ chaina dâh liata cha *Pihkheipa Reih* tahpa a châ. He paliena zie he chyhsa hluhpi ta cha âdo chaipa hawhta eimâ pyh thei ngyu aw, â do theina chhao kao hluhpi a y thei hra aw. Châhrasala, chakhie-charieh kawpa nata zôpha kawpa ta he paliena zie he eimâ laichadaipa a châ khahta la chyhsazy pi heta Reih he nô pychhôh tawhta vaw pihkhei leipa pi ta, eima pahrâna chi nata pho (*Culture & Society*) siezie hawhta reih heacheihpa nata a hmâhpaa tlaow eima châ.

Eima vaw pina chi nata pho reih hmâhpaa he eima nahkhaoh ta eima thei tuachaipa nata pahno tuachaipa châ ta. Eima ochhôh, chhôhkha, viasa nata kхиhtlâh liata bie eimâ chho chaina

reih a châpa vâta eima khopa nata angiahpazy reina awpa ta vaw hmâh pathao lymâ hra pi ta. Chadei châ vei, reih cha vaw thei hluh pi ta, vaw pahno baichhi via laih lymâ pi ta, eimâ chu via lymâ hra. Chatanachata eima vaw pina chipho reih cha vaw hmâh pi ta, eima vaw cheih pazao lymâpa a châ. Chavâta, reih he cha khihtlâh, chi nata pho ta maniah a piepa a châ.

Marapa hawtipa châta cha Mara Reih he a pikheipa reih a châ tahpa ta eima rei thei aw. Châhrasala hawtipa cha a chyhta no tawhta Mara reihacheihpazy y leina su, chi hropazy (*Viahpa/Mongyuh-pa*) hnohta soh haw sih la, Mara reih cheihpa ta, a nohoto reih châta hmâh aw vei tahpa he chyhsa tota eima pahno khai aw. Reih he a pikheipa châ ha mawh sala cha hawtipa he kheihawhpa su lia raita soh sih la, Mara reih he reikhah a vaw pathlie thai thaohtha no tawhta a hmâh thai tuachaipa a châ awpa a châ. He heta a chhopasia kawpa cha Reih he eima pikheipa châ leipa ta, â chu ta eimâ chu thaipa tlaotachâ hri.

Hlâno bei daihti nona heta India râh bei rônâh ngaita kawpa nata mohpathâh kawpa Emperor Akbara ama tahpa heta a ryureina *Court* liata reih hmâh awpa kyh liata a eichhiana vaw yha ta. Ryureina *Court* heta Arabic ma eima hmâh aw, Persian he ma eima hmâh aw? Khei hawhpa reih he ma Khazohpa ta â pyh viapa a châ aw? tahpa cha pahno'pa khoh ha ei ta. Akbara chata he hawhna heta ryhraona vaw tao ta. Hawsaihpa, nô pyh chhôh tawhta avaw pih dyupa cha chhôhpädâhpa liata ano deita ta mohôh awpa ta pa-ysa ta. Amohôhtuhpazy chata hawsaihpa cha niedo awpa ama piepa nata hmo hropoa angiahpazy ama taona liata reih pathlie tlâ leipa ta mohôh lymâ ei ta. He hawsaihpa heta khâpa reih hmahta a nahkhaoh ta a thei beih leipa vâta a kô a vaw tloh (*a vaw pitloh*) tawhta chhaota reikhah pathlie thai leipa ta a y thlâh ha. He heta a chhopasiapa cha reih he eima pikheipa châ leipa ta, eima thai chhyhpa nata achu chhyhpa a châ tahpa a palâsa pasia ngaita kaw.

**Eima Chipho Reih:** Mother-Tongue tahpa he *Eima Chipho Reih* tahpa ta chhopasia heih tua ei si. Chi to pho to heta reih noh-eihpa hnei chyu pi ta, cha eima reih nochâ hneipa cha eima nohoto kхиhsana nata ytu-ziatu liata khâchâ apazao pâ ha hrappa a châ. Eima chipho reih thai awpa he chi to pho to heta papeimawhsa ngaita kaw sai pi ta, pasô ta cheihchalo via lymâ awpa he eimâ reipahmô chyupa a châ. Chipho soh viapa nata asosâh viapazy ta reih liata hneirôh ei ta, reih hneirôhpazy he chi nata pho hmahsiepa nata asosâhpa ama châ lymâ. He hawhta eima chhopasiapa a châ khahta cha Marapa nô nata paw kalachhôh tawhta avaw pihpahawtipa chipho reih awpa cha Mara Reih a châ. Hawtipa heta Mara reih thai leipa ta Reih hropoa - *Tlaikao reih, Burmese, English* etc zy tlaotachâ hla sala cha, he hawtipa heta a *Mother-tongue* a pahlei haw, a chipho reih thai khao vei eima tah thei hra aw.

*Mother tongue* eima tahpa he eima chipho reih he na a châ eima tahpa a châ khahta cha eima vaw pina nata liahritlona, vaw laiseihna chipho reih momaih cha eima *Mother-tongue* a châ lymâ aw. A yzie cha *Mother-tongue* thai leipa ta eima y thei tahna a châ chai chuh. Reih hropoa hluhpi eima thai ngyu thei aw; châhrasala eima chipho reih chaipa eima thai leipa a châ khahta la a ki hmeiseih thai hra vei.

A hmia lâ liata eima rei chiehpa hawhta reih momaih he *Mother-tongue* a châ tlyma, chi hropazy reih a châ tlyma, eima vaw pi dyu tawhta eima thai pâ hapa he y leipa ta, reih cha eima nahkhaoh ta eima nahtliepa tawhtazy ta pahnothai pi ta, eimâ chu chhyhpa tlaotachâ hri. A yzie cha khihtlâh liata eimâ pahlao hrappa vâta reih he avaw hneipa eima châ.

**Hawtipa ta Reih â chu/thai tuachaipa (The Child's First Learned Language):** Chyhsa hluhpizy ta *Mother-tongue* he hawtipa ta a vaw pi dyu tawhta reih a vaw thai tuachaipa nata achu tuachaipa he a châ tahpa he amâ pyna zie châ ta. He chhopasia nata reipasiana he eimâ pypa a châ khahta cha he hawhna heta pachâ heih tua ei sih la. Marapa saw dopa, Mara râh liata apihpa cha, a vaw pi pataw nahta râh hropoa lâta chi pho hropoa chhôhkha hnohta sohpa ta, laiseih ha sala, Mara reih thai khao aw vei tahpa a sia thlâh ha. A pahrâna nata kхиhsana liata a chhôhkha nata viasazy reih hmâpa cha a nahkhaoh ta reih a thei tuachaipa nata pahno tuachaipa châ aw ta, reih a vaw hmâ thai tuapa a châ hra aw. A yzie cha hawtipa cha a vaw pi nota cha Marapa saw dopa ta châ taraw ta; anodeikua a *Mother-tongue* deikua cha reih hropoa - *English tlyma, Burmese tlyma, Hindi tlyma* a châ syulyu ha bâ aw tahna a châ.

Hetana heta pachâ heih tua ei sih la. Hawtipa kha *English* he reih a thai tuachaipa vaw châ ha ta; châhrasala vaw pitloh via laih lymâ ta, Mara râh liata vaw pahrâ pakhua lilaw ha ta. Mara râh liata *English* hmâna awpa a vaw y khao heih tlôh leipa vâta reih a vaw thai tuachaipa nata â chu tuachaipa *English* cha mypa ta, Mara reih ngâlâh thai ha bâ ta. English he a *Mother-tongue* a châ thei khao ma? Chavâta, achu hmiatua chaipa tlyma, thai tuachaipa tlyma, pahno tuachaipa tlyma he *Mother-tongue* a châ tahpa ta apyh khai thai hmeiseih'pa châ pyly heih hra vei.

**Reih eima thai chaipa, patuapaluana châta eima hmâpa:** Mara sawzy pi ta cha Mara reih he eimâ chu tuachaipa a châ hleikhô ta, eima pitlohma daihti lia taihta hmo patuapaluana nata pachâna châta eima hmâ chaipa a châ. Hmo kheihawhpa rai tao awpa châ sih la, Mara reih ta eima pachâna palôhrupa liata eima patuapalua lymâpa a châ. Chavâta, Mara reih he eima *Mother-tongue* a châ. He hawhta a châ nona heta chyhsa thokhazy cha Mara reih hlâta reih hropâ hmâh thai viapazy chhao vaw y thei ei ta, pakah tawhta hmo reipapua awpa no chhaota reih hropâ ta palôhrupa liata patuapaluana châta ahmâh tuapazy chhao ama y thei hra aw. Khizaw a vaw sosâh via laih lymâ ta, Mara saw hluhpi cha ama chyhta tawhta khh hro râh hropâ lâta achuna vâta a ypa hluhpi eima y. Cha nahzy chata Mara reih ta bierei papua awpa nota *English or reih* hropâ ama thaipazy ta ama vaw patuapalua tua tyh. He hawhpa nahzy he a chô liata chhopasiana zie hawhta a châ khahta cha ama *Mother-tongue* cha *English or reih hropâ* a châ.

### Biepachhâna

*Mother-tongue* chhopasiana nata reipakawhna chi palih a kawh kawpa ta za reih ha pi ta, *Mother-tongue* he a bie ta hawhta eima paliepa ta a châ khahta cha “Nô reih” tahna a châ chai. Nô cha a saw hawtipa, a hawsaihta no tawhta avaw mohôh lymâtu-pa châ ta, ochhôh liata sawzy amohôhtuh chaipa chhao a châ. Sawzy mohôhna kyh totie liata biezy achhopa ta, hawsaihpa, reihkah chhao a pathlie thai mâh leipa cha bie â chho lymâ tyh. Hawsaihpa ta reihkah a thei tuachaipa cha a nô ao-reih nata reihkah he a châ. Chavâta, hawtipa cha bie a vaw rei thai thaohta no tawhta a nô reih hmâpa nata cheipa hawhta reihkah a vaw pathlie hrapa a châ.

Reih he eima pachâna pathipalôhrupa liata hmo eima patuapaluapa yzie hnei kawpa ta eima kaw reipuapa he a châ. Pakah tawhta ao (*sound*) apuapa, yzie hnei leipa cha ‘Reih’ pitlohpâ châ thei vei. Reih eima tahpa heta dy eihpa tlyma, anuapa tlyma a hnei cheingei awpa a châ. Reih he taozie (*system*) ahneipa châ ta, tao tyhpâ (*habit*) a châ. Chi to ta reih hnei chyu pi ta, bie achhona, apachuna nata pachuna châta hmâh pi ta, Abeipa tawhta hmosaipiepa eima daopazy hry liata rônah chaipa a châ.

Reih he chi nata pho apaduatuhpa nata â pahnienhna chaipa chhao châ ta, Abeipa Khazohpâ ta chi nata pho padua n’awpa ta chhaichhi châta a hmâpa chhao a châ hra. Eima reih hmâpa heta eima châna chi nata pho liata maniah pasiasa ta, chi hropâ nata pho hropazy chhaota eima reih hmâpa tawhna heta eima châna, “Ano la Marapa, Laipa, Tlaikaopa, Kalâpa, Viahpa, etc na a châ”, tahpa maniah ama pathlu-a-pathlâh thei tyh. Eima pahno chyupa hawhta reih heta moh eihpa hnei chyu ta, a tlâhpiпа ta ama chi nata pho moh phaohpâ ta ‘Reih’ he moh ahneipa a châ. Pamosana ta - Keimo Mara chizy ta reih eima hneipa moh reina châta eima hmâpa cha ‘Mara reih’ tahpa a châ. Cha hawhna hrata, chi hro pho hropazy chhaota ama reih moh hnei chyu hra ei ta - Pawi/Lai reih, Lushai/Mizo/Viah reih/Mongyuh reih etc tahpa ta pahnopa a châ lymâ hra.



(He Article he arohtuhpa nata apapuatuuhpa pasaina nata asaothiahna chhao y hlei leipa ta, pha eima tah kawpa vâta Government Middle School Tisi, Golden Jubilee (1965-2015) 'Souvenir' tawhta lapachhuahpa châ ta, arohtuhpa nata papuatuhpazy hnohta ama pachâthaina eimâ haw. Ed.)

**Biehmia:** Eima khîh Middle School â dua tawhta kô 50 atlohma aly thei awpa a châpa he hmo lychhih ngaitapa a châ. Tisi Middle School Golden Jubilee Celebration châta patohpatiana hlupizy nata Souvenir pachhuahpanohna liata hriapasatuhpa zydua chô lâ liata alynabie nata khokheina sâh chaipa ei hlâ ei. He Article pachhohpa chhao he maniah pachutuhpazy hnohta alyna nata zana (respect) lai kawpa hneina chôta ropa a châ. He hawhpa School Jubilee Commemoration peimawhpa atheithlähna châta Souvenir liata Article chyupa ei roh hmâ hrappa he vâhnei â tah na ta, eina palysa kaw !

**Pachutuhpa y zie/duasu:** Pachutuhpa tahpa he â awna reikah rônah ngâsâpa châ ta, a yzie nata pahlypa chhao a kawhpi a hnei. Mongyu reih ta 'Teacher' tlyma 'Master' tlyma tah ei ta, cha cha Hindi-Sanskrit lâta 'Guru' ama tahpa nata akhopa a châ. India râh liata pahrâpa eima châna lâ tawhta "Viah nawh" pathipalôh liata Guru tahpa yzie nata duasu tawhta moh tua ei sih la. Guru tahpa yzie he hneirôh kaw ta, pachutuhpa tahna zy, chyhsa rônahpa tahna zy, ama theihthaipa awna châta zy hmâh ei ta, Guru he ama khazohpa hawh tlupo ta ama pachâ. Chavâta, School, College nata University liata Student-zy heta ama pachutuhpazy he thata chi ei ta, ama za hmeiseih tyh. Ama phei thaby liata abôhpa ta pachutuhpa pheipi hriapa ta anaohpa chhao ama hluh ngâsâ tyh.

India râh liata 'Guru' yzie nata duasu hawhpa cha Bible, Hebrai reikhah lâ liata 'Rabbi-pachutuhpa ' tahpa a châ. A yzie liata thata zana nata rônahna achakaihpa reikhah a châ. Bible Aramaic reikhah liata a yzie cha kao hlupi liata 'rônahpa nata zachhihpa' tahna zydua a pahly khai. Arabic reih liata Rabbi/Rav- pachutuhpa tahpa chhao he zyhna nata phôryhna kao lâ pahei nota cha Abeipa (Lord) tahna châta hmâ theipa a châ. Eima Beipa Zisu Krista chhao kha Apostol nawhzy ta 'Pachutuhpa/Rabbi' tahpa ta ama vaw aw tyhpa a châ. Cha hawhta awna reikhah asie lymâpa cha School liata pachutuhpazy eima awna zie chhao a vaw châ haw. Zyhna châbu pachutuhpa nata Secular School châbu pachutuhpa zachhihna nata rônahna he reikah thabypa lâ tawhta cha â miakhapa a châ. Eima Beipa Zisu Krista ama awna Title hawhpa achaba-tuhpa School pachutuhpazy heta 'Pachutuhpa' tahpa he alaichadai ei sala, ama châta yzie ahnei pathu ngyu aw.

**School pachuna rai rônah zie:** A tlâhpipa ta cha School liata châ achuna nata pachuna he *Education* tah tyh pi ta, a reikhah he Latin reih *Educare* tahpa tawhta lapa, a yzie 'lapapua, thaohpapua' tahna a châ. Chatanachata, pachutuhpa cha hawtizy pahno leina tawhta thaohpapua ta pahnosatuhpa, Student-zy thai leipa nata pahno leipa hmozy pathaisa ta pahnosatuhpa, ama pikheipa taotheina nata pachâtheina etc kaw hmâh/pachâ papuasa lymâtuuhpa, Student-zy hrunga su tawhta thaoh ta, sona apietuhpa a châ. Chavâta, pachutuhpa cha zohna su liata pakhaisatuhpa sathaw mei-ôh (candle) nata pakhopâpa a châ. Chanô

Evangelist, Joyce Meyer reizie hawhta chariah chhaichhizy tlyma, phusâ hluhpi tlyma hmâh byuh leipa ta, pachutuhpazy cha *Chalk* nata *Challenge* hmâh pahlaopa ta chyhsa hro a panano/taopathi theituhpa ama châ.

He Article pachhohpaa liana heta Nursery tawhta University taihta pachutuh-pazy rai duasu reihpaki khai thei aw mapi. Middle School Golden Jubilee daihti a châpa atheithlâhna chôta Elementary Level liata School pachutuh-pazy rai nata duasu eimâ nua via awpa châ sala. Pachutuhpazy he hawti hro taopathina raihria liata maohphaohna sâh ngaitapa totuhpazy ama châ. Pachutuh p'enawh heta hâta eikha liata noh 5 to ei ta, nô nata pawzy heta ama saw châta noh 2 deita ama to. School boarding liata a ypa hawtizy chhochhi cha pachutuhpazy avaona nata mohôhna ry liata zakha liata zakha (100%) daimâ a ypa ama châ. He heta pachu-tuhpazy maohphaohna lai zie nata rônah zie thata palâsa ta, ama pachupa hawti nah nô nah pawzy hlâ chhaota kao to liata pachuna ama pie thei viapa a châ. Hawtizy châta cha noh chareih ta pachutuhpazy pachuna he ama sangai-thisaih liata a rie pathu ngâsâ. Chavâta, pachutuhpazy he Text Book hmâpa ta hawtizy pachutuhpa dei châ leipa ei ta, hawtizy nôchâ-hrozies ngiapa/phapa pachu ta lâthlôh dopa liata chhihthatuhpa chhao ama châ.

**Pachuna, nietluana rai rônahpa:** School pachuna rai he nietluana rai hawhta reipa chhaota rai rônahpa a châ. Khizaw liana heta nietluana rai (Profession) nano nanopa hluhpi a y. Sawhkhâ nata *private factory, company* etc ry liata rai hluhpi a y. Saku pachuna rai (teaching profession) hawhpa deikua y tlâ vei tah thei'pa a châ. Nietluana rai hluhpi he pachuna rai thabypa theilâpa tawhta avaw ypa sai a châ. Football Club ta Football athaipa papua ta, *Kungfu* achuna heta *kungfu* athaipa, khaw bieh achuna su tawhta khawbieh athaipa, Driving School ta Motor pahieh thaipa etc a papua.

A kawh via ta reih pazao chy ei sih la; Engineering College tawhta Engineering, Law College tawhta Lawyer, Theological College tawhta Pastor-Theologian, Medical College tawhta Doctor etc ama pua lymâ tyh. Cha hawhpa achuna nata nietluana nano nanopa zydua cha School achuna su liata pachutuhpazy pachuna tawhta athaopa sai a châ. Chavâta, School liata pachutuhpazy he kao hluhpi liata chyhsa hmâtlâhpa nata hlaotlohpaa nano nanopa apapuatuuhpa sahlaozy ama châ. Nietluana rai hropaa hawhta châ leipa ta, ama ngiatlâh liata maohphaona a ypa he â sâh ngâsâ! Ama pachupa hawtizy *future* chhie nah pha â pahnienhna ama châ. Henry Brooks Adams ta â laichadaina zie liata cha pachutuhpazy he ama pachupa hawtizy chhâzaw duasu taihta a hriapha theipa ama châ.

**Châthaina Versus Hrozies thaina:** Pachuna rai rônahziey nata pachutuhpazyie/duasuzi reih ha pi ta; talmâ deikua châchuna-châthaina nata hroziethaina kyh, achuhaipazy pi ta eima pachâ peimawh awpa hmo a châ zie a chyuta ta reih tua ei sih la. Châ achuna he hro achuna ta a pazi vei khahta la chyhsa ahnykhawpa lâta eimâ papua thei. Châthaina chhao he hroziethaina ta a pazi leipa khahta la châthaina tloh hmeiseih hlei vei. Khizaw chyhsa rônahpa nata châthai viapa momaih heta ama pachutuh parohpazy chizana pie via lymâ ei ta, ama khîh nata amâ chuna su parohpaza pasôna nata nohâh taona châhzy chhao ama hnei via lymâ. Asatuhpa nôpaw nata hlâta uhthei viapazy nata nôpawpazy chizana amâ chakaih lymâ hra. Râh, khitlâh châta chyhsa hmâtlâhpa châ achhuah lymâpa ta kao hluhpi liata khitlâh hmia pangiatuhpa thlalâ ama châ tyh. Cha hawhpa chyhsazy cha châthaipa ama châ. Hmô theipa achuna su College nata University zy tawhta B.A, M.A eima kaw patlô no heta hmô thei leipa, chhôh lâ pathipalôh achuna su tawhta hrozies-nôchâ, areisi-panawhna nata reingiahna etc kao zydua lia chhaota B.A, M.A kaw patlô pâ lymâ hra ei sih la a pha kaw aw.

## **Achuhaipa nata Mara râh Politics**

*~ LB. Thatlô, Saikao.*

*with liberty and justice for all...*



Kô 2014 liana khata Joint Headquarters, MSO Aizawl-zy ta he biepipa "ACHUHAIPA NATA MARA RÂH POLITICS" hmâpa ta Mara râh nata su to râh to liata Marapa sawzy châta Essay arohpasuana ama vaw taopa cha, achuna liata Py rei awpa hnei leipa nata, Vaili Mahpaw ta Mara saw châta A AW Y maniah atao pa achatlie kawpa ta chhao rei thei leipa ei châ tarawpa ta, a biepi hmâpa heta ei palôh cha ahloh chhôpa hawh na chhôpa ta eima pôhpa liata hmah ahnia pavô ta miah atôhpa hawhta na tôh ta, anodeikua kei thotlâ saw kahmi hmahta khô beih leipa, khizaw thâtih cha rei lei, eima opa lyuhripa thâtih hmahta pahno leipa heta roh hra mawh sala hmahsiena hlâta cha pahneisaopa ei hlao pathlei aw tahpa riahchipa ta zâ thôh cha ahy pahno leipa ta he biepipa he ei vaw rôhkhei!

Anodeikua, pachâ lilaw heih na ta, a biepi lâchhâh ei roh thai tu leipa chhaota Mara reih hmahsiena achyhta chhâ a châ thlyu aw tahpa pachâna vâta Masia nah hry liata Tiamalawhpa sâkha ahlaopa hawhta athaisopazy ama hluh kawna hry liata noza pahno leipa ta nata kâchhiezôchhie kawna chôta, vaw roh hra na ta, a rohpa ama hluh tu leipa vâta a châ thlyu tly, sânona duasu liata a vaw duah na ta, kyh kha lâta a ly kaw na ta, kyhkha lâta ei no-âh ngaita kaw heih.

Kheihawhpa rai cha a vaw châpa chhaota kha lâchhâh cha rei awpa ei khona nata ei chhuahna châ chai leipa ta, Mara saw achuhaipazy duasu nata eima râh Pawliti (Politics) sie haipa liata hawti machâ alai achyh ta lâthlôh eimâ chhih haipa he ei palôh a chakhei kawpa vâta ei vaw rei khohpa tlao a châ.

Achuhaipa tahpa heta rei awpa hlupi y ta. Achuna heta a pahly kawh ngaita kaw hra. Achuna he chi thôh ta, za pachhaih pachhuah ei sih la:

- 1) Ochhôh liata achuna
- 2) Siku liata achuna

3) Khôtho lâta achuna zy châ ta, achuna cha ato hmahsiena a châ tahpa ta chhopasiapa châ sala, Chyhsa-pa he eima vaw pih pataw nahta achuna angiahpa sai eima châ hra. Anodeikua, Essay Competition ta â chhuah chaipa cha Châ achu haipazy ama châ. Chakhiahta la Achuna cha Chyhsapa hro liata peimawhh chaipa châ tlôh ta, achuhaipazy ta achuna heta khâpa ma a chhuah ta, hmahsiena maniah a tlôkhei tahpa he pahnopasia awpata hmo peimawhh chaipa a châ.

Cha hawhna hra chata 'Politics' chhao he Achuna (Education) nata khâchâ apazao hapa châ ta, Politics tahpa he Greek reih, 'Polis' 'Polity' 'Politeia' tahpa tawhta lapa châ ta, Politics Chyhsa ta cha ano liata achuna khâchâ a hnei awpa châ ta, Khizaw Chyhsa zydua heta Politics â ngiah/peimawhh leipa pakha hmahta y chachei ma pi. Achuhaipa chhaota Politics chhichâna pahno awpa byuh ta, Politician chhaota achu awpa hmo hlupi a hnei hra. A tlâhpipa ta 'Politics' tahpa yzie cha kao totie liata hmahsiena hnei ta, panano (Change) awpa he a châ tahpata a chyusia thei chaina hawhta chhopasia ei sih la eima reichhei hraoh tlyma?

Eima râh saipa ta 'Achuhaipa' nata Mara râh Politics' tahpa liata he hawhta biepipa pachhaihpachhuahpa ta chhopasia sih la a pha chai nahta pangiasa â chhih. Achuhaipa nata Mara râh Politics tahpa liata pahno awpa hmo peimawh ngaita kawpazy cha:

**1). Khazohpa pahnona liata:** Khizaw liata hmo zydua he Khazohpa taopa sai a châ nota, Khazohpa chhaota ano khopa tao hr'awpa he maniah â hnaw chaipa a châ hra. Khei hawhpa râh rai châsala kha tluta râh hmotaiotheipa nata mohpathâhpa hmahta châ hrasala Khazohpa a pahno leipa Ti nata râh cha a duah parei thei leipa ta ama râh cha keichheihna lâta ama pangai tyh. Cha hawhna hra chata kha tluta athaisopa nata Title sâh kawpa hmahta châ hra sala Khazohpa apahnoleipa achu-haipa cha hlaotlohma kih tlô thei leipa ta, hmialâ a sie n'awpa lâpi chhao palâh thei vei. Khizaw liata mopakha mohpathâh patluapazy he a tlâhpiпа ta a hluh via cha Krizyhpа Chyhса ama châ.

He hawhna hra heta Mara râh Politics sie haipa lia heta Khazohpa eima pahno vei khahta cha hmahsienâ lâ hlâta raona lâ tlao maniah a tlôkhei viapa a châ. A chhâpa cha râh nata ryureina cha Khazohpa piepa a châpa vâta maniah pietuhpa Khazohpa pahno awpa he hmo peimawhh chaipa a châ. Chavâta Achuhaipa nata Mara râh Politics tahpa liata hmo peimawhh chaipa cha Khazohpa pahnona chôta Achu ei sih la, Politics siekhei awpa he a châ.

**2). Chhôhkha duasu pahno awpa:** Achuhaipa, chhôhkha duasu a pachâ leipa maihta cha pitlohma lâ hlâta raona lâta ama pangai lymâ nahta pangiasiâ chhiih. Chhôhto he alyucho tlâ leipa pi ta, Chyhса thokha ta riethei kawpa ta Chyhса ry liata ahlao chhyhpа ta Sawzy châta ama hriapasa kaw nota achuhaipa thokhazy cha Nôpaw hriapa-sana pachâpahreih leipa ta nôpaw ta Phusâ maniah ama paphaopa cha hmo pha leipa taona lâta eima hmâh tyh. He vâ tlaita eima râh achuhaipa thokhazy cha hlaotlohma hmeiseihpa hnei thei ma pi. Cha hawh pyly ta, eima Mara râh Politics sie dâh pha leipa vâta chhôhto liata pachâna pha leipa tlô lymâ ta, eima Politician chhôhkazy chhaota eima thabypa pahno khao leipa ta chhôhkha liata pachâna pha leipa cha hnei lymâpa ta chhôhkha raona lâta maniah a tlôkheipa a châ.

**3). Ngâchhihna hro:** Chyhса hro liata hmo peimawhh chaipa miakha cha ngâchhihna hro he a châ. Ngâchhihna hro heta chyhса zachhihna nata hlaotlohma maniah pietuhpa a châ. Achuhaipazy chhocchi ta cha ngâchhihna hro peimawhh ngaita kaw ta, a viapachaipa ta eimâ chuna liata ngâchhihna hro hnei awpa he hmo peimawhh ngaita kawpa a châ. Kheihawhpa râh asosâhpa nata kheihawhpa Siku phapa lia hmahta achu hr'aw sih la keimo liata ngâchhihna hro eima hnei leipa khahta cha achu thlâhthlipa nata nôpawzy hneina pahryuh thlâhthlipa eima châ aw.

Eima râh liata achu-haipa hlupi hlaotlohma ahnei leipazy he ngâchhihna hro hnei leipa ama châ nahta pangiasiâ chhiih. Eimâ chuna hlâta hmo hropâ pachâ peimawhh viana zy, achuna hlâta khôtho lâ pua khoh viana zy, achuna hlâta viasa nata Korean Film hleikhôta Mobile liata hrukhei viana hro zy eima hneipa vâta nôpaw ta maniah ama mokhâh kaw nota a daihti lei kawpata Lahpinô/Vahpa zy eima hnei tyh. Chavâta Achuhaipa eima châ chhôhta cha hmo hropâ eima tao/hriapa chhaota achuna pakhâsana châta hmâh leipata ngâchhihna hro hneipa ta achuna he hlaotlohma eima hmô hlâ lei cha pachâ peimawhh ei sih la, Politics kyh lia chhaota ngâchhihna hro hnei ei suh u.

Ngâchhihna hro hmeiseihpa eima hnei leipa vâta eima Mara râh Politics he a sie dâh pha khao leipa ta, Politics ta â chhuahna do kawpa cha pahleipa ta sôh nata thih ta eima Chyhса châna cha maniah paraopakei khai hapa a châ. Tlawkha hmô n'awpa a châ thlâh ha khahta cha eima Chyhса châna dopa, zachhihna cha zuah khona hnei pi ta, atlyna daihti lia maihta Vote chalei awpa py liata sopa eima châ lymâ. Cha hawhpa Chyhса cha moto ta khâsaw rei khao leipa ei ta, ataotheituhpazy ta hmo phapa maniah ama piepa chhaota buakha ta liata a leidia khai ha tyh. Chavâta, eima Mara râh Politics pado awpa ta cha adona nata ngâchhihna hro he hnei awpa ta hmo peimawhh chaipa a châ.

**Paritheipa tawhta apathaisa awpa nata hrozie nôchâ mopâtlâh ta y awpa â ngiah (a byuh)**

Achuhaipazy ta cha paritheipa tawhta apathaisapa ta hrozie nôchâ mopâtlâh châpa ta y awpa he hmo peimawhh ngaita kawpa a châ. Achuhaipa nata Achu leipazy eimâ nano patluana cha hrozie nôchâ he châ ta, eima râh liata paritheipa he tlupo ta Chanô Chapaw ta maniah a paraopa he Achuhaipazy vâta a châ pachaipa ta â lâ. A chhâpa cha Chi hropâ chyhса ta sôh

paliena châta paritheipa maniah ama zuathlupa cha kyh kha ta soh ei sih la, achuhaipa thokhazy ta kô chhâna lâta Krisama ahmâh awpa ta ama chhuti daihti liata viasazy tlômo châta paritheipa nano nanopazy cha phaohipa ta paritheipa atao beih leipazy taihta eima pie tyh.

He dei châ leipa ta Marapasaw achuhaipa tho-khazy achuhaipa eima châna chhao apahno khao leipa ta paritheipa taopa ta khiliyah liata chao nah luh pahno leina taihta y pi ta, phahnai angiah kawpa ta khitlâh ta dâh ama taopazy cha â lie lâta tlao parao tyh pi ta, eima hrozie liata achuhaipa eima châna chhao sâkha hmahta a lâ vei. Chavâta, Marasaw achuhaipazy pari-theipa tawhta apathaisa awpa he hmo peimawhh ngaita kawpa a châ.

Politics liata angia awpazy chhaota paritheipa tawhta apathaisa awpa he hmo peimawh ngaita kawpa châ ta, râh ryureituhpa Politician ta paritheipa ataopa Chyhsa cha chhithatuh phapa châ beih leipa ta, râh zawpi châta hmahsienâ hlâta tymâna a tlôkhei lymâ. Râh chakaona liata ângia awpa khoh hmeiseihpa ta cha paritheipa tawhta â pathapahâ tuachai awpa â ngiah (a byuh).

### **Chi nata Pho châna liata sia awpa ângiah**

Khizaw nata India râh hleikhô ta Mawrâh chhôh liata châthaipa hluphi he Chi nata Pho châna liata sia awpa a byuhpa ta ei pahno. Chi nata Pho châna liata sianô leipa achuhaipa ta cha achuna liata hlaotloh hra sala a thaina cha hmâtlâh châ leipa châ aw ta, Khihtlâh nata râh châta phahnaina hnei leipa ta ano mo pakha châ ngâlâh ta phahnaina ahneipa a châ aw. Cha cha achuna ta â chhuahpa chhao châ hra vei.

A chhâpa cha atanoh ta eima Khizaw hmâpa he Chaihrai leipa ta, thaina ta asiehnaona daihti châ ha ta, ato liata achuna leipa ta khâpa hmo hmahta tao thai'pa châ khao vei. India râh khotalaina a hmô no chhao khata Indian Freedom Fighter-zy ta Meithei nata Chaihrai tlyma hmâh leipa ei ta, Education hmâpa ta British Sawkhâ tawhta khotalaina a hmôpa a châ. Anodeikua, khotalaina teituh-pazy khata India Chi châna siapa hnei leipa ei sala, hlaotlohnâ hmô thei aw veih ei. Chavâta, achuhaipazy ta cha Chi nata Pho châna liata siapa ta chi hro pho hropazy hlâta thai via awpa achhuahna hneipa ta achu ei sih la, Mara reih a lei/thi haipa chhao he pachha papuana rai hriapa ta chi hropazy hnohta phuahzâh lymâ ta tlao palaiseihsa awpa a chhuah chyu suh u.

Cha hawh pyly chata Mara râh Politics tahpa liata peimawh kawpa cha Chi nata Pho châna siapa moto ta eima hnei chyu awpa châ ta, a viapahchaipa ta Politics liata râh ryureituhpa châ awpa khohpa, MLA, MDC apie awpa achhuahpa ta cha Chi nata Pho châna liata a sia cheingei awpa a châ. A chhâpa cha Chi nata Pho he hmo totie hlaotlohnâ maniah pietuhpa châ ta, Mara District Council eima hnei theina chhâpa chhao chi nata Pho eihhrâhpa eima châpa vâtâ a châ.

Atanoh ta eima duasu deikua cha Chi nata Pho thapasana nata kyhpachâna hlâta mo pakha chhôhkha athôhhâhna, avyuhna (Corru-ption) pasichhihpa saita mo to palôh liata a ypa vâtâ Mara râh Politics sie dâh a do leipa a châ. Chavâta, Chi nata Pho châna liata a sianô leipa nata Chi nata Pho thapasana ahnei leipa chyhsa cha râh chakaona liata angia leipa sala, zawpi chaota he hawhpa chyhsa chi nata Pho thapasana raita ahnei leipazy cha thy ngâhpa ta atlyhna (Election) daihti lia chhaota riahphâ kawpa ta eima pathlapala awpa he hmo peimawh kawpa a châ.

### **Achhuahna siapa nata dopa hnei awpa a châ:**

Achuhaipazy hro liata khati no raita a y ngâthlâh ha awpa hmo miakha cha achhuahna siapa (Aim) eima hnei cheingei awpa a châ. Kheihawhpa hmo rai he tao hr'ei sih la achhuahna siapa eima hnei vei khahta cha hlaotlohnâ/pitlohnâ hmeiseihpa hmô thei hmeiseih aw ma pi. Apamosana ta ataopasuana lia heta râh to nata mo tota tao pha chaipa sâkhana châ awpa achhuah leipa ta, ataopasuana liata ahlaohli chakhyhpa ama y tlâ nahta pangiasa a chhîh leipa ta, achuhaipazy chhaota achhuah-na siapa khâchâ hnei awpa a châ. Eg. Dawhthy, Engineer, Professor etc.

Chavâta, achuhaipazy achhuahna hmeiseihpa khâchâ eima hnei khahta cha achuna liata diathlâ leipa aw pi ta, daihti ruapa cha Phusâ hawhta a sôna pahnopa ta hmâh thai aw pi ta, pitlohma nata chyhsa hlaotlohpâ lâta eima pangai thei aw tahpa pahno awpa â ngiah (a byuh).

Eima râh Politics sie haipa lia chhaota thokha cha achhuahna siapa eima hnei tlâ leipa vâta Mara râh Politics he ano leipa lâta pangai lymâ pi ta, moto palôh liata pachâna do leipa a tlô lymâ hapa a châ. India phopi paw eima tah tyhpâ Mahatma Ghandi-zy kha India râh châta hmo hlupi hmahsie n'awpa pachâpa ta achhuahna sia kawpa ama hneipa vâta India râh cha khotalaina hmôpa ta hmahsienâ hlupi chhao a tlôkheipa a châ.

Achhuahna siapa eima tah nota nieparuna nata avyuhna do leipa achhuahna deikua cha hnei awpa châ vei. Chavâta, Politics he mo tota eimâ ngiahpa a châ tarawpa ta a viapahchaipa ta râh chakaona liata angia awpa achhuahpa ta cha eima râh nata khitlâh châta khâpa hmahsienâ ma ei tlôkhei aw tahpa achhuahna siapa hnei awpa he hmo peimawh chaipa a châ.

### **Khâpa vâta achuhai-pa nata Politics liata angiapa ma ei châ tahpa pahnopasia awpa a châ**

Achuhaipa zydua ta eima pahno awpa peimawh chaipa cha khâpa vâta achupa ma ei châ tahpa pahnopasia awpa a châ. Cha hawhpa pachâna eima hnei vei khahta cha nôpaw ta Phusâ hlupi maniah ama paphao tyhpazy chhao ano leipa lâta hmâh aw pi ta, chhôhkha kyhpachâna zy, khitlâh nata râh thapasana zy hnei thei aw ma pi. Achuna liata eima hlaotlohpâ chhaota phahnaina ahnei leipa Uphawh lônâh hneipa hawhta eima châ aw. Chavâta, achuhaipazy ta cha keima mo pakha châta, chhôhkha châta, khitlâh châta, Awnanopa nata râh châta achuhaipa eima châ tahpa pahnopasia awpa a châ.

Cha hawhna hra chata Pawliti kyh liata chhao khâpa vâta ma Pawlitiks liata ei ngia aw tahpa pachâna siapa hnei tuachai awpa he hmo peimawh kawpa châ ta, cha hawhpa pachâna hnei leipa ta Pawliti liata eima y khahta cha yzie hnei leipa, râh paraopa-keituhpa dei eima châ aw. Khiatlâh nata Râh thapasana hnei leipa ta mo pakha, chhôhkha sanawh-rinô padua n'awpa tlâ khohpa vâta Pawliti liata eimâ ngia khahta cha khitlâh nata râh ta pasana tlôkhei ta, moleina a papôhsa tyh. Khazohpa bie chhaota chyhsa thokha amâ sâh nahta zawpi amâ rôh tyh tahpa maniah a chhopa a châ.

Atanoh ta eima Mara râh Pawliti sie haipa liata hri-iah chichhih kawpa atlô haipazy eima sai ngâ nota khâpa vâta ma Pawliti liata ei ngia tahpa pachâna a y leipa vâta nata mo pakha nata chhôhkha sanawh-rinô châta avyuhna pasichhihpâ hri-iah pha lei kawpa cha zawpi palôh liata chhao thata maniah tlôthlu ta, eima Mara Autonomous District Council Opi (Office) cha Krizyhpâ chhôhkha, pahânoh ta Achhyna O liata chhôhkha kipa ta amâ pakhypa hawhta chhôhkha apahmaopasiahna lâta a lie ta, rietheipa châta deikua Lô-o hawhta a châ haw.

Chavâta, "ACHUHAI-PA NATA MARA RÂH POLITICS" tahpa liata a chô liata biepi palâsapazy khi eima tao khai thei khahta cha achuhaipazy ta hmahsienâ hlupi hnei aw pi ta, Mara râh Politics sie haipa liata hri-iah pathaiah leipazy chhao pathaisapa ta khâpa châta ma Politics he eima hmâ tahpa pachâna khâchâ eima hnei khahta cha Mara râh heta kao totie liata a nano (Change) aw ta, mylâ hânoh thyutlia saw châta lâthlôh thiehpâ a pahy aw ta, hmahsienâ chi nano nanopazy hneipa ta adona nata ngâchhihnâ hleikhô ta râh kyhpachâna zy eima hnei lymâ aw tahpa he khâchâ ei ngiapâ.

**"Hrona sâkha ngâlâh ei hneipa  
he pei ei tah!"**  
~ Joseph B. Hlychho.



Nathan Hale

Aw..kha my noh vaw chhipa kha la, chyhsa thokha châta noh phapa, ngiatlâhpa nata khochhihpa, hrochhôh châta my thei khao lei awpa a châ nota; thokhazy châta deikua cha he khizaw liata eima pasôpa nata kho chaipa hrona chhâna thina daihti a châ thlâh ha bao! Chyhsapa eima pahrâna ti nata tlâh, daihti hmâna dâhzy â lyu tlâ leipa vâ chhao a châ thlyu aw. Râh ryureina sawkhâzy ta thailei pachâsana vâta hrochhôh Lô-o (jail) liata atâh awpa zy, pa-aosao awpa zy cha ama chô liata bietluna chahnaopa-inazy y hôlô ta. Cha hawhpa duahmo liana chata atanoh nâmâ nata kei he avaw duah haw sih la, khâpa bie ma reih aw pi ta, kheihawhpa su ma eimâ tlyh sualuah aw vâ i?? Kheihawhpa su rai atlyh sih la, khochhihpa nata byuh achhîh kawpa rai za y vei.

Châhrasala khizaw chyhsa zydua, hneirôh, dyhchhie, hmipha, châthai nata ahy hmahta dâh chô liata chareipa y tlâ leipa pi ta, dâh ry liata chareipa sai eima châ. Anodeikua, dâh paraopa ta eima y khiata la dâh ta eima chô liata ryureih aw ta, eima paraona ty hawhta sôh gluhipi chei theina zy, hrochhôh lô-o liata atâh theina zy, pa-aosaona taihta eima chô liata dâh ta ryu a reih thei. Atanoh liata nâmâ nata kei tlai chhao he eima hmotao pasina vâta he hawhpa duahmo liata aduah theipa eima châ hra.

Pa-aosao n'awpa ta daosâhpa ama taopa liana chata thyudyu chapawsaw hmipha khochhih ngâsâpa nata a mokhaoh liata chihuna nata ngiarohna rai ahnei leipa, Feet charu rachhôh ta asâhpa, a thina daihti hâpa ta aduah thlâh hapa he y ta. Cha pa-aosaona rai hriatuh awpa nata pa-aosaona dawhkâh hâtuhpa chata a raihria awpa kho-iah ahnei lei kawpa cha dawh tloh awpa hâ thlâh ha ta. Pa-aosao awpazy cha ama daihti tlô hlâta bie ama rei khohpa reina daihti chyuta ama pie tyhpa hawhta thyudyupa Nathan Hale chhao cha daihti pie hrapa châ ta. Cha chapawsaw thyudyu riahpha kawpa cha, mopa ta a hmia liata ngiarohna nata chihuna rai hnei leina chôta hetana heta bie cha reih ta, "Ei chi nata ei râh châta hlâ awpa hrona sâkha ngâlâh ei hneipa he pei ei tah!", tahpa ta.

Chatawhcha pa-aosaona dawhkâh liata raihriatuhpa chata a rai cha pazao ta, cha thyudyupa cha chhâzaw ta sihnôh kua khao lei awpa ta thina chata a chôta ryu a reih haw. Cha a biereipa chata a chheipâh liata vaihtuhpa pheisailzy cha châmaiñ ta thari nata thisaiñ liata a hriapa hawhna chata a biereipa chata hria ngâsâ ha ta.

US Connecticut State, Coventry khîh liata kô 1756 liana khata chapaw hawhti Nathan Hale cha vaw pih ta. He hawtipa he hawti khochhihpa nata aly-ua pha ngâsâpa, khopaoñ ngâsâpa he a châ. Saku vaw kiah ta, châ thaithieipa nata Sport thei kawpa chyhsa châ ta, Saku liata Sport ama hneina daihti maihta taothei chaipa pakha a châ lymâpa a châ. Hawti apahnie-pasâ kawpa a châpa vâta High Jump lia chhochhi cha dohkhi azaw theipa hawhta ama reih. Mohropazy hlâta â nano patlua kaw heihna cha Barrel pahluapa liata a khodâh hawhta a kiah theipa cha a châ. Leadership Quality hneipha kawpa a châpa vâta â chuna maih liata chhihtuhpa châ lymâ ta, a viasa nata pachutuhpazy palôh pahnie-thai ngâsâ ta, chyhsazy ta ama tlaichhai kaw tyh.

Daihti vaw sie laih ta, ama chhôhkazy ta biechhotuhpa Evangelist châ awpa ama khokheipa vâta Bible achuna lâta a daihti hmâh pazao ta. Yale khîh liata vâro tlai Bible â chu tawhta biechhotuhpa rai cha hria ta, daihti khachâ rakha ma biechhotuhpa rai a hria tawhta ano

liata ti nata râh thapasana palôhrupa a laipa vâta, New London lâ a pasie ta. Cha no chata United States cha British sawkhâ ryureina ry liata ama yno a châ. US ta khotalaina atei haino châ ta, ama rie a thei ngâsâ. British sawkhâ chhih-thana ry liata chhie (tax) thata khei tyh ei ta, cha chata ama râh zawpi kihsa tôhtuna nata sapa nata thlahpa hro liata thata rie a pathei ei. Cha rietheina tawhta sasyh rei â reih ta, khotalaina hnei awpa cha ama hmo khoh chaipa nata byuh chaipa a châ.

George Washington nata a pyzy ta thapi phiapa ta khotalaina Independent teipa ta keih ama vaw chakâpa cha, a râh zawpi palôh pahnies ngâsâ ta, Khotalaina khona dâhphipa chata cha thyudyu pachuna rai hria ngâpa chhao cha a pachuna rai hnôhchhypa ta ti nata râh châta a daihti zydua hmâh khaipa ta, khotalaina ateipazy hnohta â vaw pahlao hra haw. Zawpi ahmaoh-pakhyna liata bie reih tyh ta, khotalaina eima hmô hlâ lei la hnôh lâ kua leipa ta riahpha kawpa ta eima tei hnolo awpa a châ, tahpa ta pasyuna bie a reih tyh. Cha hawhta zawpi pasyuna bie pha kawpa a rei tyhpaz chata zawpi palôh pahnies kaw tyh ta, US President hmiaituapa George Washington khata khoh kaw ta 'Thyudyu khochhihpa' tahpa ta a moh a vaw bi ngâkawpa a châ.

New London Troops chhihtha ta, Massachusetts lâ pangai laih heih ta, zawpi hluhpizy ta ama pazi lymâ. A kiah liata hrâsie awpa cha vaw tlaichhai ngaita kaw sai ei ta, chyhsa riahphapa nata chapawsawpa, viasazy rairuna nata hrialâhpazy pahnothaina ahnei kawpa a châpa vâta daihti rei leipa liata 'Captain of Company' châna piepa a châ. Cha hawhta a hria phana vâ chata a hmahlana liata zawi baokhâna hmô via lymâ ta, thata hmah ama sie. Cha hawhta khotalaina teituhpazy cha US su to liata hmah thata sie ei ta, anodeikua Long Islands, atahmâta New York ama tahpa liata cha ama thatlô thei leipa ta, cha su lapapua achhuahna vâ chata thyudyu riahphapa Nathan Hale hrona chata a vaw tao haw.

Long Islands (New York) liata British pheisaihzy ryureina nata chhihthana dâhzy mopathlina rai hria awpa a vaw ngiah hâ bâ ta, cha rai cha rai khochhihpa, rainaopa nata byuhchhihpa châ chacheita vei tahpa cha mo to pahnop a châ. Cha rai tlai cha thyudyu khochhihpa Nathan Hale ngiatlâh liata a vaw pahnies ha ta, ti nata râh châta tahpa palôh hneina chôta keih a vaw chakâ pathao haw. A viasa nata kyhpachâtuhpazy chata cha su chichhihpa lâ cha sie lei awpa ta thata thlyu ei ta, Nathan Hale deikua chata, "Ti nata râh châta pha viana awpa a châ khiata la keima châta khâpa hmah chichhih awpa nata rairu awpa rai y vei", tahpa ta â vaw chhy ei. Philadelphia su liata 13 Colonies lyuhchâpa atyuhpâ-khypazy chata America Independent châta kô 1776 Thlarâh noh 20 rao ei ta, he noh liata Nathan Hale cha a yna su tawhta kua awpa ta ryh ama vaw rao.

Cha su chichhihna lâ cha mopathlina rai hria awpa ta sie ta, pachutuhpa hawhta a ypa vâta mohpathlituhpa hawhta vaw pachâ hlei leipa ei ta. A hmo pahno khohpazy cha châhna apa kawpa liata Latin reih ta roh tyh ta, a raihria cha patlô hapa hawhta a pachâpa ta aly kawpa ta charei-palao laih ta. A yna su lâ kua awpa ta raopa daihti cha vaw tlô ta, kua awpa ta athao ha ta. Cha noh cha British pheisaihzy cha nohsa a aih hólô ei ta, a riathawhpa ta pheisaihzy cha Bye bye kei pie ei ta, cha chata British pheisaihzy pachâna pahâsa khao leipa ta, Meithei chhaota avaw duahnao ei ta, Nathan Hale châta taotheipa rai vaw y khao vei. A pôhpa nata hmozy cha hrao ei ta, a châropa cha hmô ha ei ta, cha a châropa cha British sawkhâ châta thina châmaiaw awpa sai vaw châ thlâh ha ta! British pheisaih hyutuhpa General Howe hnohta achhi ei ta, ano chata Nathan Hale chôta ryureina bie papua ta, pa-aosao awpa a vaw châ haw.

Kô 1783 liata Treaty of Versailles ta America Independent â pykheina noh ngiatlâhpa cha a ô hmâ khao leipa ta, a hrona cha a vaw chhâ haw. A thi chyta a biereipa chata atanoh taihta America zawi palôh liata bie khâ reih ta, râh kyhpachâtuhpaza nata Politician-zy ta atahmâ taihta reihpachhuahpa ta hro thatlôna châta ama vaw hmâ tyh. Ama râh châta khotalaina teituhpazy hry liata Nathan Hale cha atôhpipa pakha hawhta rei lymâpa châ ta, atanoh taihta ama History rona phia liata su liah-lôh chaipa patosapa ta, ama pathipalôh liata thi thei khao vei.

A chô liata eima vaw rei hapa hawh heta, atanoh nâmâ nata keima heti eima chi nata râh châta khâpa he ma tao thei hra pi ta, apasaih hra aw pi ta, khehta ma keih eima chakâ thei hra aw tly? Eima theina, thaina, sona nata adona ta eima chi nata râh pachha ei sih la; tymâna,

raiguna atlôkhei-tuhpa nata papuapaleituhpa châ achhuah leipa ta, thyudyu riahpha Nathan hale hawhta thapasana nata kyhpachâna hmeiseihpa hneina chôta, riahpha ngaitapa ta eima ti nata râh châta hmialâ atôhtuhpa châ a chhuah chyu suh u. Yh, he tlai he atanoh Mara thyutliapazy maophphao-na nata taozie awpa rai a châ.

Ei châ ly kaw ei.

# REIH MACHÂPA

**Khiahlô vâ-** Soh, no avâhpa

**Kholy** - Khoh

**Khôpheih** - Rakhô

**Kimaihnô** - Chaoliah, râhsa chikha

**Kirôh nô** - Zuneihpa, râhsa angia

kawpa

**Khuchâh** - Richâhpa

**Khuru poh chi** - Si-sâri

**Kumaih leipa** - Hmotao asaomâ leipa, dyutlai leipa

**Kumâ hnei leipa**- Apaosiah leipa, asaomâ leipa

**Kumâ hneipa** -Apaosiah kawpa, hmotao asaomâ kawpa

**Kuchô-pheichô-Hmâhtlâh** châ leipa chyhsa,a phahla kawpa

**Khotlyh** -Pha ta viapa hnei

**Kho paoh** - Kho apaohpa

**Keithlao** - Thokih pai, chyhsa

hneirôhpazy

**Khasu-** Lahpinô tlyma vahpa

Kimaihnô - Chaoliah, râhsa chikha

Kirôh nô - Zuneihpa, râhsa angia

kawpa

Khuchâh - Richâhpa

Khuru poh chi - Si-sâri

Kumaih leipa - Hmotao asaomâ leipa,  
dyutlai leipa

Kumâ hnei leipa- Apaosiah leipa,  
asaomâ leipa

Kumâ hneipa - Apaosiah kawpa,  
hmotao asaomâ kawpa

Ku-chô-phei-chô- Hmâhtlâh a châ leipa  
chyhsa, a phahla kawpa

Khotlyh - Pha ta viapa hnei

Kho paoh - Kho apaohpa

Keithlao - Thokih pai, chyhsa

hneirôhpazy

Khasu - Lahpinô tlyma, avahpa  
tlyma reina

Khukha - Richâhkapa

- Lahpinô tlyma, avahpa

tlyma reina

## Thyutliapazy eimâ chadie ma?

~ *Beihrua Lodua.*



He biepipa he ei pahnopa vâta nata ei thaisoh kawpa vâta rohpa châ leipa na ta, thyutliapazy duasu pha viapa a y thei n'awpa hnabeiseihpa ta, a pahno viapa nata athai viapazy pahao n'awpa ta ei vaw rohpa a châ.

**Pachâna mothlaw liata:** Zawpi hluhpi hryhri liata thyutlia ahlachlâ ngâkawpazy ei sai ngâ nota, ei pachâna thlahpa chata ei chhuah leina râh lâ na chhihthapa ta, ei thlahpa cha a viavi pathao ha heih. Cha thyutliazy hry liana chata abei chhôhkha sawchapaw matlupa hawhta khohchhihpa nata palaikhei achhih kawpa zy, ahy hmahta palôh pasasa achhuah leipa hmia aphaohpa zy chhao ei hmô hôlô hra ei. Achhyna O lâta apakhy awpazy ama châpa vâta a ngia kaw sai ei ta, maisâh tawhta 'Nâmo parih pathlazy saih u...' miah ama tah ngâpa chhaota a hao thai lei awpa hawh tluta angiapazy ama châ.

Ama laihsa nawh heih hra cha ama sâ seih kawpa nata angia kawpa cha bei chai biepiepa khiah maw tahpa hawh tlupo ta ama beinô cha daodo ei ta. Pasa tlôh lei awpa ta â daihpa rakhata ta ama beinô cha nai zaolaopa nata areisi kawpa ta a ngiatlâhzy cha pazei hnolo ei ta. Khazohpa Noh my vaosa chawhpa a vaw hmie pi ta, laihsa eima pavyh â rai khai tawta kuhva hrohpa eima cha-ei thlu no tluta chhôhkha adyhryhpa la khizaw lia a y khao nahta pangiasa a chhih vei. Cha hawhta alyna kipa hneipa ta eima thlalôh kaw nota hawtizy hnohta Sande Siku liata ama thyu awpa, phusâ thua dipa araituh nô châta uahva achhihpa, laihsa chhithai kawpazy sai ama châ. Châhrasala, keimo o pazu pavaw pachasapazy châta deikua la cha tlupo ta laihsa khoh-iah ahneipa nata chhithai kawpazy cha chhôhkha nôhrah awpa ta a saduthlie ngâh'pa châ vei, 'Deiva awhsî chakhei chhuah-pa hawh' deita châ tlôh ei ta. Hui ha!!! Kei satlia lôhmaoh chhôhso a bua kaw heih na...!! Châhrasala, Vâlyuhchâpa alei lâ a zupa hawh tlaita a chhithaipa nata chariah hmia lia chhaota china rai a hnei lei awpa, pasaipha hawhta riahphapazy cha râh liamarih za hria pha thei awpa su liata rai pahriasa hr'awpa deikua cha ahy hmia za leipa ta ei vaw saduthlie tyh ei. Kei sadu-thliena deikua he la ahy nôpaw hmahta uasa aw vei ei tahpa deikua a pahnopasiatuh chaipa ei châ.

**Pawhrâhpa Takô chhaota:** Eima hlâta uhthei viapazy châ achú awpa ta viah-râh lâ miah ama siesai ngâ nota la 'ama hrochhôh ta rietheina nata dyhchhiena rai pahno khao aw veih ei' tahpa he pathipalôh liata eima uahva chaipa a châ tyh. Chhôhkha Pawhrâhpa ta a hmâthai chaipa tâkô laipa chhaota lyu lâ sie awpa ta eima pazipazy nata la hmo ahmie lei kawpa tlai na a vaw châ. Chutyh noh zâlâ nohchhôh rakha cha Class a y khao leipa vâta Siku kiahpâh pathai tyh pi ta, eima hria thai lei kawpa chhaota chhôhkha pawhrâhpa ta a tâkô a hmâ khao leipa, a sai-ie khai hapa hmâpa ta eima hyutuh penawh kiahpâh lia hria pi ta, eima thapha kaw

tyh. Eima thapawh vâta eima palopasah thlâ tyh bao nahta miah ama ra leipazy kha Pachutuhpazy reithai tlâh ama châ hmeiseih.

Zâlâ moh ama paki khai tawhna cha eima nôpaw siena hnienhô sia lei kawpa lâpi achhihpa ta lyu lâ thlai sie pi ta. Lathlôh kiah liata cheisiah nata pavaw eima siah pathlahpazy cha sahria lia khô awpa chhao pasaih leipa pi ta, eima nôpaw eima pamosa hlâ zydua cha ku ta eima chaba ngâthlâh tyh. Eima khizaw liana cha kha tluta eima hro miah apalysatuhpwa kha a ypa ta pahno khao va na. Lyu eima kei tlô pataw nahta Pawhrâhpwa cha Chapu laikathi liata chhâmeih kô asâh kawpa cha thlai chhawh pathlah ta, nôhrâhpwa hnohta, "Khawh, hâti nah nie awpa vaw rao tyh", tahpa nata chhâmeih panyu kawpa a pazawpa cha a raoh ta. Nôhrâhpwa chata, "Amâ va na", tahna daihti chhao y hra vei, chhâmeih a rao khai hlâta ta lyu chao liata vahtie aloh ngâkawpa tawhta ziza chakua kawpa thlihua vaw pathlipa chata eima baih liata mathlai dizy a chyhtaa cha a vaw pahi pathao ha bâ hra.

Mathlai di chhao a hi pha hlâta mawmyh hna chaheihpa nata chhâmeih panyu rao khai dyupa cha nie pi ta, pachâna hropwa rai y khao vei. Siku liata eima hyutuh penawh ta Homework thai lei vâta miah ama hriena nata rana zydua chhao kha, mâ sa pi ta eima my pathipa hawh deita a vaw châ haw. Eima paphasapa dei châ vei, eima thapha ta, a ly pi ta eima thlalôh kaw. Kha daihti rei lei ta liana kha Bei Zisu a zu ha sala, Vârâh lâ kia n'awpa miah a pakhâ thei awpa a lyupa hmo sâkha ngâlâh a y, cha cha khâpa hro châ vei; Lyu kiahpâh chavah lâta tithaina lâpi liata *athei panyupa* eima nie mâh leipa ngâlâh kha tlâ a châ bâ. Kha dawh kha chhôhtha liata eima khizaw kha atahmâno hawhta chyhsa ta miah ama pahno tlamaw aw tahpa ta a ru lâta eima chi kawpa y tlâ hra vei, ahy hmahta miah ama chhu thei nahta pangiasa hra ma pi. Khizaw he keimo eih tlai châ ta, ahy hmahta miah chhu thei awpa y hra veih ei. Eima pathipalôh liamarah chaipa liata thata Vâ-hla pathluah pi ta, pahnienaa thata eima phuahpwa a châ!!

**Eima uahva nga-thlâh chy aw ma?**: Kô 4 rachhôh khô hapa liana kha cha keimo Marasaw thyutliazy nata alyupa ta buchadoh nata chiatlao hryhrih liata thapawh kawpa ta ataopasuana (games & sports) daihti ama vaw hmâh tyh hra. Atahmâ deikua cha Mawrâh sawkhâ phana nata phahnaingiahna zawzi ta Aizawl satlia nata laihsazy cha aly nata thapha kawna chôta Sports lâchhâh ama nodi dâhphinzazy cha papaipta ta ama y pathao haw. Atahmâ kô 2 rakha a vaw khô hapa tawhna khata cha State khhipi a châna hawhta Aizawl cha India râh liata akhaihna tlyliah (field) hnei pha chaipa hry liata pahlaopa a vaw châ haw. Aizawl AR Tlyliah (field) nata Rajiv Gandhi Stadium, Mualpui zy cha Artificial Grass pha kawpa phawpa châ ta, atahmâ cha azo lâ akhaih thei awpa taihta pachhuahpwa-nohpa a châ haw.

Aizawl dei châ leipa ta Lôlei khhipi liata chhao *Thuamluai Tlyliah* cha Artificial Grass pha kawpa ta phawpa châ heih ta, Champhai Chhangphut Field chhao Artificial Turf phaw khai hapa a châ hra. Ama reih ama thai khao leipa vâta chi nata pho alei hapa hawhta eima pachâ tyhpwa LAI/ LAWNGTLAI District dâhdei chhao a kho khao ma pi! Mo hropazy Tlyliah tawhta vaw puapa ama pathaiah thlâ bâ bao nahta keimo cha leipalietuhpa hawhta chiatlao chhaota o lâ eimâ di ngâthlâh chy. Ballbooth achaba leipa ei sala raihriana tawhta avaw dipa khia maw eima tah tlamaw tyh, palôhpasa â chhiih ngâsâ. Lytai Tlyliah cha Artificial Grass phaw n'awpa ta raihria pathaopa a châ ha heih. Ama vaw patlô tita cha Mara thyutliazy pi he kha tluta ma uahva heih aw pi ta, kha tluta ma eima palôh a pasa heih vâ he?

Artificial Grass phawpa Tlyliah eima hnei leipa hleikhô ta *Basketball court, Lawn tennis court, Park, Museum, Swimming pool, Cinema hall* eima hnei leipa a vaw hluh dâh rimâ cha!! Eima hneichhôhpwa 'Indoor Stadium-Badminton Court' chhao he thyutliapazy hmahsie n'awpa hlâta cha ahyzy thisaih sâhpa (BP Sâhpa) pahnai n'awpa nata ahyzy pythu pasy n'awpa lâta hmâpa tlaow a châ khai haw. Siaha District liata apahrâpa thyutlia châ awpa chhao hmiakai â chhiih khao leina lâ a châ ha bâ. Mara Thyutliapazy he Sports hmâpa ta nietlua thei awpa ama hluh thlâ bao nahta atahmâ cha *Sports Infra-structure* phapa eima hnei leipa vâta paritheipa sei liata thyutlia hluhpi cha eimâ fâh hai. Chavâta, Thyutliapazy pi heta Mobile mâ rupa, Motor phapa nata O-lyu rônah kawpazy hnei khoh viapa Râh chhiihthatuhpa hlâta cha,

Mararâh nata a chhôh liata apahrâpazy kypachâtuhpa chyhsa riahphapa na eima pasâhsa tahpa he miah pahnokhei u la eima khoh kaw bâ.

### *Sawkhâ ryureina liata thyutliapazy*

Kao hro lâta eima sai khiahta cha thyutliazy amâ vaw sosâh kaw bâ, thokha hlupi khizaw phasana liata y hra ei sala, thokhazy deikua âmo ngâlâh apachâ khao leipa ta ‘eima ti nata râh châta khâpa e ei tao thei hra aw?’ tahpa palôh aphaohpa hlupi ama y hra. *Eima râh he a chhôhmaru lâta hri-iah pathaih khao leipa ta, Mara Society he taopa-thipa nata vaih awpa a byuh ha na’* tahpa chhao ama hluh kaw bâ hra. Thata achu ei ta, khizaw hmo siezie pahno kaw ei ta, Râh taopathi awpa he ama palôhrupa liata a lai ngaita. Cha nota Democracy hmâh pado lei daihmâ hapa vâta Party biehneina lai tupa heta thyutliazy châta su y thai khao vei. Zawpi ta ai kaw hra ei sala Senior viapazy ta ama tlei khoh leipa vâta thyutlia-pazy châta sie n’awpa lâpi khawpa a châ ha tyh. India Parliament lia chhaota thyutlia hlupi cha ryureih thei awpa ta su piepa ama châ pathao haw. Eima râh lia deikua cha rairu eima tah kaw chy, khâpa vâta ma a châ sualuah vâ tly? *Râh taopathina he Party Member hlupi nata Manifesto liata a pahnieh chai leipa ta, ryureina chôchahrei a chabatuhpa phana nata siana liata tlao â pahnieh.* Chavâta, kha tluta Party liata Senior-pa nata Politics hnienhôh hnei hlupi chhaota reipasipasuana ahnei-pa chyhsa cha eima chati pathlah ngâh bâ awpa he a daihti a châ kaw bâ na tah t’u..? Election daihti liata, “He he cha nieparu ahmâhpa, chyhsa ngâchhhil leipa nata râh hlâta chhôhkha sanawhzy khohkhei viapa”, tahpa ta ama vaw paphôh aw, chavâta atahmâ ta Politician rônâh kawpazy he hlâno chhiekheituhpa hawh deita nata Cha-ia hawh tluta khâsaw eima rei lei daihti tlô aw vei tahpa ahy hmahta reih thei ma pi.

### *Atlâh pakyuna*

Atahmâ thyutliazy daihti he lâlao kaw ta, eima hneipazy ta a pha mâh vei hra sala hmo hlupi cha eima mo ta hmô pi ta, ku ta hria pi ta, pakah ta eima padi ha hra. Hmô thlâh ha pi ta hria thei tlôh pi va, aw ngâ taraw pi ta thei tlôh ei vâ. Pasi awpa y taraw leipa ta khâchâ miah vieh tlôh ta, mo ta hmô awpa y taraw leipa ta miah pahli thlâh hapa zy, a khaoh â aw thlâh tarawpa ta khâchâ miah pamai thlâh hapa zy hlupi a y. Cha hawhta daihti a chadie-chahmypy nata atymâpa cha atahmâ Mara thyutliazy duasu a châ. He daihti he azaw pakhô ta siesai syulyu awpa byuh â chhhik kaw! Châhrasala hmo theipa châ tlôh va, a pei ngaita kaw. Chavâta, eima râh nôpawzy heta thyutliapazy nodi-dâhphina he miah pahnokhei ei sala, hmah miah ama lakhei awpa he a byuh hmeiseih. Cha nota Mara thyutliapa zydua chhaota dusawta ta eima hâ awpa he la eima hawh tu tlamañna, khizaw noh nata daihtizy â chalih leipa hawhta eima chheipâh nata râh liatazy hmahsiena â zaw ta azaw ngâpazy he achadai â daih bâ vei ma? Eima yna su tawhta hâtuhpâ ngâlâh châ khao leipa ta, Socially, Politically, Educationally, Economically, etc liata thata tiama papua bâ hra ei suh vy.

... hro yrupa nata arôh ngâhaipa;  
thlie awpa nata lo awpa chhao hmahta a paw pakai mâh leipa,  
thyutlia pawngianazy he khatita e a paw a pakai hra vâ tly..?

## **Mara reih na thai ma??**

He a ry liata Mara reih (Machâ reih) zy he â do chaipa atlyh tua rai mah y, Issue heihpa liata âdona eima vaw palâsa aw.

### **1). Zohpatlai**

- a). Ahlai hlâpa reina
- b). Chyhsa zoh kawpa
- c). Chhôh patlaipa

### **2). Zamali**

- a). Chyhsa riahphapa
- b). Lôvâpa chikha

c). Zawpi reina

**3). Vyhai**

a). Chavyh reina

b). Lahuah reina

c). Chyhsa avy haipa

**4). Vâpô**

a). Ochhôh reina

b). Pavaw lai kawpa

c). Satliazy ariepakhyna

**5). Tohrâh**

a). Meithei

b). Chyhsa mohphapha

c). Râhsa ahrâh kawpa

**Kyhpachâna:**  
**Khizaw liata hmo rônah chaipa**  
(Valentine's Day Special)  
~ *HC.Malsawmthanga.*



Târi 14 Hmypi he 'Valentine's Day' a châ tahpa pahno leipa y ngyu' ma pi. He noh peimawhpa nata khizaw ta a pasô kawpa he thlaita eima tlô heih aw. He noh he hmâh tyh pi ta, reih tyh hra pi ta, a vaw puana dâh pahno leipa deikua eima y ngyu thei; chavâta Valentine's Day Special châta he Châpaw he ei vaw ropa a châ.

Kha daihti no khata Europe, Izi nata Middle East râhzy cha bei thatlô kawpazy ta avao ei ta, he bei râh lai ngaitapazy he Roman Empire châta chhotuh chichhihpa a châ thei awpa ama châ. He vâ tlai hetu Emperor Claudius-II châta cha pahâh kawpa ta mokuh ramâ khaih thei'pa vaw châ ngyu' vei. A chariah chhaichhizy patiah ta, pheisaihzy tha patlô viapa ta khatino raita chariahzy hmiachhy thei awpa ta apatohpatia awpa cha rai peimawh hmiatuapa za châ lei thei vei.

Pheisaih thatlôpa padua awpa ta hmo angiahpazy patua-palua lymâ ta. Cha hry liata hmo miakha ta a sapapuapa chata khizaw thâtih rona phia liata bo peimawh ngaitapa a vaw

tawhpapua haw. Chapaw pitlohpa maih cha Rome Pheisaih liata amâ ngia awpa châ ta, pheisaih thatlôpa nata ngâtlâhpa ama châ thei n'awpa pachâna vâta a châ thlyu tly, pheisaih nah cha lahpinô hnei awpa pasaih leipa ta. He biepiepa hrochhiepa ta he mâmyh, hrona yna lia maihta y zôzawpa kyhpachâna lâlai paty-pamâ khai ha ta, kha daihti nota Rome liata satlia nata laihsa likawh kyhpachâna cha pachâröhna nata mâchhie-sana saikaopa lâta pachâsa khai ha bao!

Claudius ta lahpinô hnei pakhâ hrasala, kyhpachâna deikua pakhâ thei vei! Mahatma Gandhi ta, "Hrona yna maih liata kyhpachâna a y", a tahpa hawh tlaita, Rome abeina râh chhôh liata chanô nata chapaw likawh liata kyhpachâna zôzawhpa cha chhiepacchô thei vei. Cha hawhta ama duahmo a châ hapa vâ chata, ama kyhpachâ chaipazy nata kyhpachâna pawti zyhkhoh hr'awpa a khohpa pheisaihzy chata a ru lâta ahneina dawh cha Claudius nahkhoa tlô pha lei awpa ta parosa tyh ei ta. Râh liata Mopathaih (Saint) riahphapa St. Valentine chata cha hawhta a ru lâta ahneipazy cha ku a vaw patusa tyh ei.

Emperor Cladius-II chata cha hawhta a dâh nata phôh taopa paraopa ta, a ru lâta ahneina dawh paro tyhpa pyu sidiahpa cha vaw thei ha bâ ta! Ku patusa tyhtuhpa Valentine cha atâhna Opi liata khôpa châ ha ta. Abei nata bei machâzy ryureina hmiakô liata â vaw duah tina chata hetana heta a chôchâh ama vaw pachia haw – 'ngiahthaina asâh chaipa ta pa-aosao awpa' tahpa a châ! Chatanachata, kyhpachâpazy chôta kyhpachâna a buakheipa vâta Mopathaihpa Valentine cha AD 496 khata pa-aosaopa a vaw châ haw.

Ama vyuhpa ta kyhpachâna vâta moleipa hawh tlaita thailei pachâsapa ta hrona sôhpa pahleituhpa Valentine cha khizaw ta my thei beih leipa ta. Kyhpachâna Lyuhchâpa thina noh Hmypi noh 14 cha 'Kyhpachâna Noh' tahpa ta khizaw râh pôhpa-lôhpa liata ahmâpa a vaw châ. He noh â vaw pahieh nahta he cha, kyhpachâpazy likah liata kyhpachâna chata paw pakai rili ta, paleih ta a reipapua thai leipa kyhpachâna zôh a zawhpa chata chhôhso liama-rihpa nata thisaih taihta chahryhpapua ta, chyhsapa pano likah azaona cha pa-i viapa ta a y tyh.

Khizaw su nano nanopa liata he noh he pasô kaw ei ta, hmâna dâh deikua a lyu tlâ thlyu vei. Anglican nata Lutheran Church zy ta Kû pathaihpa hawhta cha-ypa ta kyhchhina chhaota ama vaw hmâh lymâ. Catholic awna-nopazy chhaota kha hlâ viano kha cha Cha-y noh ta vaw hmâh tyh ei ta, a tlia via tawhta deikua Cha-y khao hlei leipa ei ta, anodeikua moto palôhrupa liata deikua a peimawhna cha za chokua via hlei vei. Kyhpachâna lyubie paru ahlâtuh awpa ta Card zy â paphao ei ta, viasa â pakaoh viapazy chata ama kyhpachâ-pazy chhaota su miakha liata Valentine's Day cha hmâhkoh ei ta; kyhpachâna pawti cha kyhpachâpa nata kyhpachâ-tuhpazy chhaota ahy thângiah leipa ta ama zyh tyh!

Laihna tlâh ananopa vâta akao hreilei thei leipazy chhaota he noh he cha chhôhso saduthliena nata mothlawpa liata â kao ei ta, ahy pahnokhei leipa ta kyhpachâna bieru totie ama vaw paryh tyhpa a châ. Â...keima hlâta nama pahno via aw, Valentine's Day ama hmâna dâh he la. Eima pahno awpa deikua cha, Catholic awnanopa History liana heta Mopathaihpa Valentine tahpa moh aphaohpa he vaw y hôlô ei ta, he vâ heta Valentine's Day vaw puana dâh liata a eichhiana a vaw y tyh; atahmâta eima reipa he ama rei via chaipa a châ.

Chata tly, kyhpachâna he Khazohpa ta chyhsapazy chôta a hmosaipiepa hry liata peimawhna ahnei chaipa miakha cha a za châ ngaita tlai na! King James Version Bible liata cha, "The Greatest Things in the World: Paul's Chapter of Love", tahpa ta, II Kawrini 13-na cha za reih ta. 'Chyhsapa nata Vâlyuh-châpazy hawhta bie reih hra aw sala, kyhpachâna ei hnei tlôh lei khiata la, dawh tlyma paotlâ paro thlâhthlipa tlyma ei châ aw...Kyhpachâna ta dao thei ta, a nô pha hra ta, hiatlia leipa ta, a palai leipa ta...ato a hnabeiseih ta, ato pasa a tao patlô tyh...tahpa ta za pahri-paziah laih ta. A chhâna liata, "Chatanachata he hmo miathôhpa-angiapâna zy, hnabeiseihna zy, kyhpachâna zy he a y thlâh ha aw; hezy hryta rônah chaipa cha kyhpachâna he a châ", tahpa ta a za reih.

# LITERARY TERMS

**Novel:** Novel tahpa he Italian nahta ‘Novella’ ama tahpa he châ ta, Mara reih ta cha a chyuna zie ta ‘Phôhpa’ eima tahpa he a châ. Phôhpa a châpa maihta ‘Novel’ châ khai veih ei. Chyhsapa ta amâ tyhpa hmo hmeiseihpa, chyhsapa hrozie nôchâ nata chyhsapa chô liata hmo atlôpa, mopakha ta hmo â tyhpa tlyma, râh ta rairuna â tyhpa tlyma, chyhsapa khihsa liata riethei rairuna amâ tyh laihpa kao nano nanopazy lâta aheihpa, châbu phôhpa siezie ta ama rohpa he ‘Novel’ tah a pahlypazy châ ta, pahnei saisona awpa châta bie ama rohpa tlyma, satlia laihsa vâ-iana bie ama rohpa tlyma, chichhihpa thâtih rohpadypa ta ama rohpa tlyma cha Novel heta pahly khai hlei vei.

**Oxymaron:** He he bie a chakhia kawpa, â paliepahna ta a ypa bie, hlabie liata ama hmâpa he a châ. Molai-mochyh, Viahchao-chakeih, Thina-hrona, Chhienoh-phanoh, A saih- a râh, Hâti-uhthei tah hawhpa bie apazao laihpa he, ‘Oxymaron’ ama tahpa a châ. A ry liata Oxymaron sie zie William Shakespear Châbu rohpa, ‘Romeo and Juliet’ tahpa liata Romeo biereipa vaw soh tua sih la:

*O heavy lightness! Serious vanity!  
Mis-shape chaos of well-seeming forms!  
Feather of lead, bright smoke, cold fire, sick health!*

He eima palâsapa William Shakespear bie reipa hâ alapa ta, Richard Crashaw ama tahpa ta, ‘An Hymn of the Nativity’, tahpa a rohpa liata Oxymaron bie sie zie ta vaw roh heih hra ta, â ngia kaw hrapa vâta eima palâsa hra tua aw.

*Welcome, all wonders in one sight!  
Eternity shut in a span,  
Summer in winter, day in night,  
Heaven in earth, God in man!*

## Châpaphao rônahpa

**(Paris tlahnaona rarôh-pa liata a lahpinô ama thie hapa paw pakha ta thietuhpa (terrorist-zy) châ a paphaopa)**



Târi 13 Phia-pi, 2015 liata moleipazy ta Paris liata Concert Hall miakha, ‘Bataclan’ ama tlahnaona liata a lahpinô ama thiepa hapa, Antoine Leiris-ta ISIS riahkapazy lâta a châpaphaopa he vaw reih hra tua rai:

“Chutyh zâ liana khata hro y patluapa la ei chi ta - ei kyhpachâ chaipa, ei sawchapawpa nô na lapa ei chi ta, châhrasala, nâmô la châ hao aw vei ei na. Ahyzy ma nama châ tahpa pahno leipa na ta, cha pahno awpa khoh hra va na. Thlahpa athi hapa deita châ tlôh ei chi ta. He nama khazohpa, ano châta liany nama chei tyhpa heta, ano hawhta, ano kakuapa hawhta maniah tao tlôh khahta cha, ei lahpinô sapa liata theisâlô â ngiapa zydua kha a chhôhso liata hmahzôh paphaosatupa ama châ tlai aw.

Chavâta, namâ hnabeiseihpa, nama chô liata ahaona palôh phaoh awpa achhuah va na. Nâmô ahao awpa ta eina khoh ei chi, châhrasala, ahaona achhypa-liepa he nâmô hawhta, hrunga nata ngâna liata paona deita a châ aw. Chipa ta a chalyu awpa ta na khoh ei chi ta, ei chyhsalâhpazy chô liata ngâna hnei lei awpa ta na khoh ei chi ta, keima sasyh ei boh thei n'awpa ta ei khotalaina hlâ awpa ta eina khoh ei chi. Atahmâ bawlaw heta pahniepa ta nama ypâ ha.

Achhô azâ ta ngiahtiah lei kawpa ta ei mokhâh tawhta, atamy liana khata ei lahpinô cha hmô na ta. Chutyh zâ liata a pua awpa chyta a chhieleipa hawhna khata pha thlâh ha chy ta, kô 12 a khô hapa liata a kyhpachâna bâlia ei kyh pathao tuachai nota a chhithaina hawhna tlai khata a chhithai thlâh ha chy. He pahleina heta eina pasasa tlai, he pasana heta pahnien a chyhnawhpa a cha pie thlyu aw ei; châhrasala, he pasana heta na ypâ pahsi aw vei. Ano cha eima hnointa khatino raita a y aw tahpa pahno na ta; kyhpachâna khotalai kawpa ta a chareina thlahpa apahâna su liana chata eimâ tyh heih aw, tahpa pahno na ta, cha su deikua cha la nâmô heta tlô thei khao aw vei ei chi. Atahmâ cha pano deita châ ha pi ta, ei sawchapawpa nata keima; châhrasala khizaw pheisah zydua hlâta eima tha a tlô via...!!”

Leiris nata a lahpinô heta thla 17 ta uhtheipa sawchapaw Melvil ama hnei hai. Târi 13 Phiaipi, 2015 liana khata ISIS riahkapazy ta ama tuapa hawhta ama reipazy ta France khhipi Paris liata su nano nanopa tlahnau ei ta; chyhsa 129 ta hrone ama pahleipa kha a châ. Leiris lahpinô chhao he chyhsa 88 ama thina su, ‘Bataclan’ liana khata y hrone ta, a hrone sôh kawpa a pahlei ha hrone châ. He châpaphao rônahpa heta chyhsa hluhpi palôh pahnies ta, Krizyhpazy châta thi hnôh lâta thlahpa pahâna râh khochhîh kawpa eima hneipa thlalôh â chhîh zie palâpasiasa kawpa a châ.

## Football khizaw liata chhiena rarôh-y viapazy



**1. Estadio Nacional, Lima, Peru:** Târi 24 Patô, 1964 khata Peru nata Argentina-zy ta Olympic Qualifier cha Estadio Nacional Satdium liata akhaih ei ta, Argentina ta 1-0 ta hmia amâ chhîh hai. Daihti chhâ chy dâhdei ta Peru ta apasuhna Kaw za pangia ei ta, daihti a chhâ pâ haw. Fans thokhazy cha tlyliah dôhpa azawpakhôpa ta Referee cha tlahnau ei ta, cha pataw nahta Police-zy ta Fans-zy cha thlaita hmiachhypa ta ku ama pathla. Zawpi cha ama hiehâh via ngâkaw ta, tlyliah lâ cha pangai via rili ei ta, cha tawh cha Police-zy ta Tear Gas hmâpa ta zawpi cha

papai amâ chhuah. Satdium ochhi cha khaw khaipa châ ta, zawpi nôpopa cha ochhi liata pua awpa achhu chhiechhu ei ta, ochhi â khaw tahpa ama pahno leipa vâta thata ochhi liata pua achhuahpa chata anâ chaimâh ei ta, a hmia lâta ypaazy cha thata chahnachakhi ei ta, ama hupopa vâta chyhsa thata ama thi. Zawpi hiehâhpa cha Satdium khôtho lâlai liazy ta hmobaoh thata paraopa ta Police-zy cha tlahnao ei ta, he chhienâ vâta chyhsa 318 tlai ama thi. He he Football History liata chhienâ rarôh-y chaipa ta reipa a châ.

## **2. Accra Sports Stadium, Accra, Ghana:**

Târi 9 Patô, 2001 khata Hearths of Oak Sporting Club nata Asante Kotoka Club zy cha Accra Sports Stadium liata a hmiachhy ei ta. He lia hetâ Hearths of Oak cha 2-1 ta pahniena ama to. Ama pahnienâ hapa Kotoka Fans hiehâhpazy chata atyuna dyuchhai nata hmobaoh hropazy ta tlyliah cha tlahnao ei ta, Police-zy ta Tear Gas nata hârie theisâlô (rubber bullets) ta zawpizy cha ama tlahnao hra. Zawpizy cha ama noraih ta, ama nôpo ta, amâ chhuh-awhna liata chyhsa 127 tlai ama thi. Police Officer hluhpi cha he chôchâh vâta pabâpa ama châ.

## **3. Hillsborough Stadium, Sheffield, England:**

Liverpool nata Not-tingham Forest zy cha Hillsborough Stadium liata târi 15 Pachawh, 1989 khata FA Cup Semi Final Match akhiah ei ta, Liverpool Fans-zy cha angiana ochhi miakha raopa châ ei ta, anodeikua amâ tyu n'awpa su raopa lia cha Fans-zy cha a tlô khao leipa ei ta, chyhsa hluhpi a ngiachhi ei ta, he vâ heta puana ochhi chhao pahy hapa a châ. He hawhta amâ chadie kawpa vâta Fans-zy cha liahsa bie chieh hapa atyuna lâ thlai pangai lymâ ei ta, Tlyliah dôhna cha thata chadie ha bâ ei ta. Thata amâ chadie hapa vâta Fans-zy chata dôhpa cha nâpapao awpa amâ chhuah ha bâ. Police nata Security zy chhao chata Fans â tah thei lei kawpazy cha pachhaih thei khao leipa ei ta, cha hawhta zawpi achadiepa vâta thata amâ chatôhna liana chata chyhsa 94 tlai thi ei ta, a hnôh lâta chyhsa 2 ama thichhi heih. He tawhta cha English Football tlyliah liata tlyliah dôhpa he ama pachhâsa hapa a châ.

## **4. Dashrath Stadium, Kathmandu, Nepal:**

Dashrath Stadium liata Nepal nata Bangladesh zy ta amâ khaih hai nota Pareih (hailstorm) cha thata tla ta, Stadium Satnd sâpalih hryta sâkha ngâlâh a chô khupa a châpa vâta cha lâ cha zawpi thata pangai ei ta. Police-zy ta zawpizy cha amâ tymâ lei n'awpa ta vaw pakhâ ei ta, cha tawh cha zawpi hluhpi cha puana ochhi lâ apôpi ta ama pangai haw. Puana ochhi cha vaw khaw khai ha tlôh ei ta, cha hawhta thata amâ chatôhna liata Fans-zy yna Tunnel cha cho ha ta, chyhsa 93 thi ei ta, 100 zy ta hmah ama phaoh. He chhienâ tlô daihti he târi 12 Pamih, 1988 kha a châ.

## **5. Estadio Mateo Flores, Guatemala City,**

Târi 16 Phiata, 1996 khata Guatemala nata Costa Rica zy cha FIFA 1998 World Cup Qualifying Match akhiah awpa ta Estadio Mateo Flores Stadium liata apôhpakhy ei ta. Match pathao hlâta zawpi 37,500 ngâlâh atlôh theina liata 50,000 zy cha Stadium chhôh lâ angia ei ta, zawpi atyuna atlôhleina vâta tlyliah dôhpa liana chata buana tlô ta, chyhsa 84 tlaita hrona ama pahlei. Zawpi atlôh leina taihta Ticket piepapuapa nata Stadium Design sianô leipa vâta atlôpa hawhta ama reih chai.

## **6. Port Said Stadium, Port Said, Egypt:**

Târi 1 Hmypi, 2012 khata Al-Masry nata Al-Ahly Club-zy cha Egypt liata akhiah ei ta, akhiah pachhâ pataw nahta pahniena atopa Al-Masry Fans-zy cha tlyliah lâ angipa ta Al-Ahly Players nata Fans-zy cha mahsô, chaizôh, alô nata zaoozify hmâpa ta thata tlahnopa ta buana ama tlôkhei. Fans 74-zy cha a su liata ama thi. Investigation liata â lâna zie ta cha Police nata Military Force-zy cha buana taotuhpazy pachhaipa hlâta Players-zy ama nyuna liata daihti hmâh via ei ta, Supporters-zy likawh pakhâna chhao ama pahy tahpa pahnopa a châ.

Football History liata chhienâ rarôh-y viapa thokhazy cha a su, a daihti nata chyhsa athipa zie ngâlâh eima vaw palâsa bâ aw:


**7. El Monumental** (River Plate Stadium), Buenos Aires, Argentina: 71 Dead - June 23rd, 1968 Match between Boca Juniors and River Plate.

**8. Lenin Stadium** (Luzhniki Stadium), Moscow: 66 Dead - 20th of October, 1982 Match between Spartak Moscow and Dutch team HFC Haarlem.

**9. Ibrox Park, Glasgow**, Scotland: 66 Dead - January 2nd 1971 Match between Rangers and Celtic.

**10. Valley Parade Stadium**, Bradford, England: 56 Dead - May 11th 1985 Match between Bradford City and Lincoln City.

## Kô 2015 khata India liata noh kha ta eikha Krizyhp taolana tlô



Christian Advocacy Group ta ama palâsana liata, kô 2015 chhôh khata India râh liata Krizyhpazy chôta taolana cha noh kha ta ei kha tlô lymâpa hawhta a châna zie ama reih. Joseph Dias, Convener of Mumbai-based Catholic Secular Forum ta World Watch Monitor a chhona liata, zâhkô khata India râh liata ei 355 tlai Krizyhpazy chôta tlahnaona tlô ta, ei 200 tlai cha tlahnaona laipa (major incidents) a châ. Târi 18 January, 2016 khata Forum Report cha papuapa châ ta, cha liana chata India râh cha Krizyhpazy châta râh thlalôhchhihpa a châ leizie ama palâsa. Pastor 7 thiepa châ ei ta, Nuns hluppi patupakhipa châ ei ta, Anti-Conversion Law hmâpa ta Krizyhpaz hluhpi patupa ama châ.

Praveen Togadia, VHP's International Working President ta târi 8 January, 2016 ta Report a papuapa liata, Hindu-zy ta zyna hropa lâta apalie hapazy lapangia heihna policy ama hneipa 'Ghar Wapsi' Programme hmahlana ry liata India râh liata Krizyhp 5,00,000 hlei nata Muslim manôh 2,50,000 hlei tlai cha Hindu zyna lâ ama lapangia pakhua heihna zie reih ta, cha hawhta a châ nota VHP National General Secretary Y. Raghavulu deikua ta cha kô to ta India râh liata 8,00,000 Hindu-zy cha zyna hropa lâ amâ palie tyhna zie a reih.

Catholic Secular Forum (CSF) Report ta 'India Christian Persecution' ta ama palâsana liata kô 2015 khata Pastor 7 nata machâ 1 thiepa châ ei ta, Krizyhp taola ataopa he manôh 8,000 rachhôh châ ei ta, Achhyna o hlupi paraopa a châ. State hry liata Madhya Pradesh liata taolana hlup chai ta, Tamil Nadu ta pazi ta, Jharkhand cha sâthôhna ama châ zie chhao ama palâsa hra.

## **ZISU KRISTA MOH VÂTA 100 MILLION HLEI TAOLA TAO HAI** (Kô to ta Krizyhpazy taolana hlup via lymâ)



Christian Charity Report ta a palâsana liata, khizaw su nano nanopa liata Krizyhp 100 Million hleizy tlai cha Zisu Krista moh vâta taola tao haipa nata kao nano nanopa ta rie pathei haipa ama châ zie a palâsa. He lia hetu Krizyhpazy dei châ leipa ei ta, zyna chynawhpa pazipa hlupi chhao zyna lai viapazy ta thata ama taola hra tahpa Report liata palâsapa a châ. Vatican City, L' Osservatore Romano thâtihbu ta a palâsana liata cha, Krizyhpazy he khizaw su to liata taolapa ta y hai ei ta, zyna hropa tawhta mo pa-eihpa nata pathluapa-eih via pachaipa ama châna zie a palâsa. Khizaw râh nano nanopa liata su hlupizy cha zyhna hropazy hlâta Krizyhpazy châta chi a chhîh pachai ta, a pachaipa ta North Korea chhochhi cha Krizyhpazy châta su aboh lei ngaitapa a châ. He râh lia hetu Krizyhp 50,000 tawhta 2,00,000 rachhôhzy cha patâh haipa ama châ zie Report liata ama palâsa hra.

Middle East nata Africa râh thokhazy liata chhao Krizyhpazy thata taolapa châ ei ta, a tlia tawhta Islamic State (IS) ama vaw lai tawhta nata Boko Haram riahkapazy ama vaw lai tawh chhochhi cha he râhzy liata Krizyhpazy cha thata pahleipahlôpa ama châ zie he Report lia hetu ama palâsa. Report liata â lâna zie ta cha, âzaopa ta kô 13 chhôh tlai North Korea cha Krizyhpazy châta râh chichhih chaipa ta atlypa châ ta, he râh lia hetu Krizyhp 2,00,000 rachhôhzy cha thata taolapa ta patâhpa ama châ hai zie reih ei ta, chadao-chadaona rai y leipa ta taolapa ama châ tyh. Krizyhpazy taola viapa râh 50 hry tawhta râh 40 zy cha Muslim râh ama châ zie palâsapa châ ta, taolana he kô tota a hlup via lymâna zie nata atakô tawhta chhochhi cha thata apôh awpa ta ama pangiasi zie ama palâsa hra.

**"KYHPACHÂNA"**  
~ *L. Beimokhai.*

*Kyhpachâna vâta vaw pih na ta,*

*Kyhpachâna ta mohôhpa châ na ta;  
 Kyhpachâna hry liata vaw laiseih na ta,  
 Kyhpachâna vâta vaw pitlohpa ei châ.*  
*Kyhpachâna vâta a ly tyh na ta,  
 Kyhpachâna vâta pahnei tyh hra na ta;  
 Kyhpachâna vâta palôh chhao pasa tyh hra ta,  
 Kyhpachâna vâta raithlih chhao ei palo tyh hra.*  
*Kyhpachâna cha daohthei ta,  
 Kyhpachâna ta a ngiahthai tyh ta;  
 Kyhpachâna ta a ly n'awpa tlua tyh ta,  
 Kyhpachâna vâ pyly ta na ky tyh hra aw.*  
*Kyhpachâna ta chhôhkha tao ta,  
 Kyhpachâna vâta lôh â du tyh pi ta;  
 Kyhpachâna vâta chhoreipa châ tyh pi ta,  
 Kyhpachâna ta a taopathi tyh.*  
*Kyhpachâna vâta lei nata vâ adyryhna,  
 Kyhpachâna vâta sawchapaw matlupa miah pie;  
 Kyhpachâna vâta thisaih sôh a loh,  
 Kyhpachâna vâta thaichâpa eima vaw châ.*

## **Khizaw liata hmotaotheipazy**

#1	Vladimir Putin	President of Russia
#2	Angela Merkel	Chancellor of Germany
#3	Barack Obama	President of United States
#4	Pope Francis	Head of Roman Catholic Church
#5	Xi Jinping	President of China
#6	Bill Gates	Bill & Melinda Gates Foundation
#7	Janet Yellen	American Economist
#8	David Cameron	UK Prime Minister
#9	Narendra Modi	PM of India
#10	Larry Page	CEO of Alphabet Inc

## **NATIONAL BRAVERY AWARD 2016**

### **Siaha satlia ahlao hra**



Siaha Vaihpi- III Sathia Ramdinthara cha Puhpaa Narendra Modi, Prime Minister of India tawhta National Bravery Award-Bapu Gaidhani Award a dao. Ramdinthara heta a viasa pano Siaha Transformer kiahpâh liata atuhpa Current ta a patuzy hrona cha a vaw pachhapa kha a

châ. Atakô he India râh pôpalôhpa tawhta Hawti riahphapa chyhsa 25, chapaw 22 nata chanô 3 hnohta lymâ piepa ama châ.

Lymâzy he Category sâ 5 ta pachhaihpa châ ta, Bharat Award he chyhsa pakha hnohta piepa châ ta, Geeta Chopra Award nata Sanjay Chopra Award chhao chyhsa pakha hnöh raihrie ta piepa ama châ hra. Bapu Gaidhani Award deikua chyhsa pathôh hnohta piepa châ ta, a hropâ chyhsa 19 zy hnohta deikua lymâ thlâthlipa piepa ama châ.

He lymâ adao awpazy he High Powered Committee, Central Ministeries/Departments nano nanopa tawhta Representatives, NGOs tawhta nata India Council For Child Welfare (ICCW) Office Bearers zy ta amâ tlypa a châ. National Bravery Award Scheme he kô 1957 tawhta ama vaw pie pathaopa kha a châ. Pandit Nehru ta chapaw hawti pakha nata chanô hawti pakhazy hnohta lymâ a vaw pie pathaopa ei kha a châ. He lymâ heta Medal, Certificate nata Phusâzy â chakaih.

Incentives nano nanopa piepa châ ei ta, Central Sawkhâ ta Schools nata Graduations taihta baona pie aw ta, State Sawkhâ thokhazy chhaota he Awardee-zy hnohta baona a pie tyh hra ei. Central Sawkhâ ta Professional Courses- Engineering, Medical, Polytechnic liatazy Seat Reservation a taopa hra ei. India râh chhôh zydua liata a saipa ta Train ta khih ama tlyh thei hra.

He hawhpa liata Siaha satlia ta lymâ a daopa he eimâ lykhei hmeiseih. Ramdinthara heta India râh liata chyhsa peimawhpa zydua President, Vice President, Prime Minister, Army Chief, Navy Chief, Lt. Governor Delhi, Delhi Chief Minister etc zy â hmô ei. Ramdinthara he MSO Joint Headquarters, Delhi zy ta ama buakhei lymâ.

Atakô Republic Day Celebration, New Delhi liata Ramdinthara he Parade-kheipa a châ. Master Title piepa châ ta, he Title he â chakaih pâ lymâ bâ aw.

**(Source: Maralandnews Netwok).**

#### **DI & NAWH CROSSWORD ACHHYNA**



# NÔPAW BIEPAVEIHHPA

**72. Maniah ku liata savyuh lai:** Mohropa hmo a pha via awpa hawhta pachâna hneipa.

**73. My kha ti chhao doh leipa:** Hmo kheihawhp a tlyma a daih rei leipa, ngâchhih thai leipa reina.

**74. Mochaopa sa patu ta patu:** Palôh a pachhu patlai thai leipa, hmo miakha liata palôh pachhôpa, pachhâna miakha deita ta ahneipa reina.

**75. Manôh tho pangawh, Chapie tho pangawh:** Chyhsa chhichâna ama hnei nahta â sâh zie reina.

**76. Mo kyh lei, Sa kyh lei:** Viasa rihchâh a tlapei thai leipa reina.

**77. Mei pakâ, Ti paphao:** My chiehpa thâtih reipa; Avaw y thai khao lei awpa thâtih reipa.

**78. Mei pachhai, Ti pakua:** Khâpa hmâhta a pasah leipa, chyhsa i-ypa reina, riakhiepa reina.

**79. Meisaih chaby:** Hmo pha lei kawpa â tyhpa reina.

**80. Nô chho thai, Paw chho thai, A nô tlâh beih chhoh thai vâ, A paw kâpu sa thai vâ:** Nô nata paw a pachy kawpa chyhsa reina.

**81. Noh nata tlâh hmâhta amâ tlei:** Ngiahthaina a pha zie, pachhâthaina a pha zie pakhona bie reipa.

**82. Noh saw, Thla saw:** Khih asa theipa saw, Abei sawzy reina.

**83. Noh tla chyta sâh zawpa:** Daihyt daih-mâ kawpa ta hmaotaopa reina.

**84. Noh nata tlâh ta zawh:** Chyhsa kyh reipa, thâ pachhie pahru laihpa, zawpi pahno thei awpa ta chyhsa kyh reipa.

**85. Nohzuah hryta kaopi â tho tyh:** A phapa hry liata a chhiepa a ypa reina.

**86. Noh chhi pha, noh tla pha:** Chyhsa veihseihpazy mohphana kyh reina.

**87. Nohki hâhzâ ta:** Mylâ hâh-noh daihti avaw tlô awpa reina.

**88. Ngalo miakha thupa, hrâbyh byh kha dua rô:** Chyhsa pakhapa vâta chyhsa hluhpi thâchhiekheipa a châ thei zie reina.

## MARA RAPIH (MUSIC) CHHAICHHIZY

He Mara Music (Rapih) chhaichhizy he a nuhby piena zie hawhta ama moh pahno achhuah la, achhyna cha Puhp MC. Pabei, Assistant Secretary, Board of Mara Literature tlyma, Satlia L. Beimokhai, Assistant Editor, Hla nata Bie ku lia tlyma vaw pangia u la, apado khaipa hry liata vâhnei chaipa ta lymâ Rs. 200 a patu thei aw. Âmo he BML Office, MADC Office Top Floor liata amâ tyuh.

Crossword kha vaw tao tyh pi ta, nama pahâkhei leipa ma a châ tly, avaw chhypa y veih ei chi. Chavâta atahmâ Issue liata la vaw tao khao mâh ma pi. Issue heihpa liata eima vaw tao pathi heih aw.

